

KUTÈÈLEJA, KUJINGULULA,

KWENZA CÌDÌ DÎYÌ

DYÀ NZAMBÌ DYÀMBA

 Mpindyewu, mikàbà yà mèyi eyi, bwà disangisha edi mu dindà emu, ki nyà disumbisha to, yìdi ànu bwà Èkèleeyiyà anyì bwà mutu kampànda, bwalu mmitàngile Dilongesha. Kàdi mu masangisha à pambèlu pààpa, yìdi yìlela cimvundù, bwàlu mbikolè bwà bantu bàbìdì bàà kutùdì kumònabò bintu mu mùshindù ùmwè menemene, kàdi bìvwa bìkèngela bwà twêtu kwikalà ne mwoyi ùmwè, nànscha bìshi. Kàdi cyôci, twêtu mu tabernacle emu, mikàbà yà mèyi eyi yìdi, nudi numònà pa... Yidi ànu bwà balundà cyanàànà, ne bikwàbò.

² Mpindyewu twinyikààyi mitù yètù bwà katancì kakesè cyanàànà bwà disambila. Mbanganyì bàdì bàswè kubàvùlukabò panùdì ne mitù yènù miinyika apu? Ànu ku cyanza cyela muulu cyanàànà, wamba ne: “Mukalenge, ndi—ndi mu lukèngelu leelù ewu, ne ndi dijinga ne ngâsà Webè,” nànscha ciikàle cinyì.

³ Taatù wetù wa mu Dyulu, tudi tuseemena mpindyewu ku Nkwasa Webè wa ngâsà, bwalu tudi balòmbìibwe bwà kucyènza. Kàdi bàkatwàmbila kùdì Mwan'Èbè, ne Musùngidi wetù, bwà ne bu twêtu mwà kuKulòmba cintu kanà cyônsò mu Dînà Dyèndè, nebâtùpèci. Ki bwà cinyì, Mukalenge, bamanyè ne tudi ne mwoyi mu mindidimbì yà Dilwa Dyèndè, nènku mpindyewu biimàne mu mindidimbì yà luse Lwèndè, dìbà adi tudi baswè kulòmba, Mukalenge, bwà Wêwè kusungula, ku Nyumà Mwímpè, bintu bìvwa bìkèngela bwà twêtu kulòmba abi. Nènku tudi tuumvwa mu dindà emu, ne kabyéna mwà kwikalà bibèngangane ne Dîyì Dyèbè anyì bwakàne Bwèbè bunène to, ne luse Lwèbè ne ngâsà, bu twêtu mwà kulòmba ne tupetàku disàmbiibwa dyà pabwàdì leelù ewu dyumukila kùdì Nyumà Mwímpè. Bwà ne Wàbwelakù munkaci mwètù ne wàjingululakù meeji à myoyi yètù, wàtùbuulwilakù myaba yà butekête bwètù, ne wòndopakù mabèdì ètù, ne wòndopakù myoyi yìdi micibùlùke, ne wàsùngilakù bàdì bajìmine, ne wàlongolola bantu bwà Dilwa Dyèndè. Mukalenge, tèèléjààku disambila edi.

⁴ Mpindyewu netùbalè Dîyì Dyèbè. Nènku—nènku tudi tulòmba, Mukalenge, bwà ne pa dileesònà dyètù dyà kàalaasà kàà Dyàlumingu mu dindà emu, bwà Wêwè kutwàla dimvwija dyà dibala ne kuDibuulwila myoyi yètù. Bwalu, tudi tulwa mwab'ewu bwà kiipàcìla kàmwèpelè. Kwôkò kiipàcìlìaku, kàdi

kàmwè, nkàà kutàmba kuKumanya bîmpe menemene. Twêtù bâdì beena Kilstò, ku Diitabuuja, tudi baswè kuKumanya bîmpè bitàmbe. Aba bâdì kabàyì banjì kulwa beena Kilstò abu, mbaswè kuKumanya bu MusÙngidi wabò. Aba bâdì bàsaama, mbaswè kuKumanya bu Mwondopi wabò. Ne tudi tulòmba bwà kakwìkadi muntu nànsha umwe uumuka mu nzùbu emu, byanza bitupù nànsha, kàdi bwà mulòmbo wônsò wikalè mûjìibwe mu katòba, ne dijinga dyônsò dikùmbjàìibwe, ne muntu—ne muntu yônsò mwikale ne disànkà, bùùmukila mu nzùbu emu, bàmba, bu bàvvà bâfùmìna ku Emmawùsè abu ne: “Myoyi yètù kayìvva yilàkuka kapyà munda mwètù, pàvvà Ye wàkula neetù mu njila apu anyì?” Bwalu tudi tulòmba nùnku mu Dînà dyà Yesù. Amen.

⁵ Mpindyewu bwènù nwènù bâdì baswè kubuulula mu Mukàndà wènù abu. Pa ciibidilu, ndi mujandule ne, mu masangisha à butangadiki, bwà ne ànu tusunsa tutwè ku makumi àbìdì anyì makumi àsàtù ntùdi twènza diyiisha dyà cikùmà dyà nyumà, pashiìshe dibìkila dyà ku cyoshelu. Kàdi bu mùdì eci kàlaasà kàà Dyàlumingu, ncyèna muswè kucyènza mùshindù awu nànsha. Ndi ndyùmvwa mutambe kulombodiibwa bwà kwangata dîbà dyànyì ne kwakula pa Dîyì.

⁶ Mpindyewu, kwôkò muntu kampànda kàyì mudyumvwe bîmpè to, bwà mashìkà àbúngì menemene, cintu cìmwèpelè cyûdì ne cyà kwenza ncyà... Mwanèetù, mulami wa ntempèlò, ùdi lwà paanyimà pàà èkèleeyìà pààpa, ela wêwè ànu cyanza cyèbè muulu mùshindù ewu lwà paanyimà pààpa, kudiye, nènku yéyè neàbàndishè luuya. Nènku tudi baswè bwà wêwè kwikale mucyankàme ne kudyùmvwa bîmpè menemene. Nènku tèèlejàayì Dîyì, bwalu tudi tweyemena Nyumà Mwímpè bwà kutùlongesha Dîyì dyà Nzambi. Kàdi nudi bônsò mwà kutèèleja bîmpè anyì, lwà panyimà pààpa? Nwènù mwà kutèèleja bîmpè, elàayì byanza byènù muulu, ní nudi—ní nudi mwà kutèèleja bîmpè. Mbîmpè.

⁷ Mpindyewu ndi muswè bwà nùbuululè pàmwè naanyì, ndi ne cyena-bwalu kampàndà cifunda kaaba aka, ne Mufundu kampànda. Pa nànku ndi muswè bwà nùbuululè pàmwè naanyì, dyàmbedi, ku Mukàndà wa Loomò, Loomò, nshapità wa 9. Nènku tudi baswè kubala bwà dileesònà dyà Mifundu, dyàmbedi, mu Loomò 9.11.

(*Bwalu bânà abu kabàyì banji kulediibwa, anyì kabàyì bénze bîmpè anyì bibì to, bwà ne kiipàcìlà kàà Nzambi bilondèshìle disungula kukùmbànaku, kabiyì ku byenzedi to, kàdi bwà ewu udi ubìkila;*)

Bàvwa bambile maamù ne: Mwanàbutè neàsadilè mwakùnyì.

Bu mwàkafundiabo ne, ndi munange Yakòbò, ne ndi mukine Esawù.

⁸ Nzambì àsakidilèku mabènesha Èndè ku dibala dyà Mufùndu ewu. Nènku mpindyewu bwà cyena-bwalu, bwà kushìndika dileesònà dyànyì, ndi muswè kwangata eci cyena-bwalu: *Kutèèleja, Kujingulula, Kwenza Cìdì Dìyì Dyà Nzambì Dyàmba*. Anyishaayi ncyambùlùlè kàbidi. “Kutèèleja, ne kujingulula, ne pashìshe kwenza cìdì Dìyì dyà Nzambì dyàmba.”

⁹ Mpindyewu, tudi bamanyè bîmpe menemene, twêtù bâdì bôndola Mifùndu munyà ne butükù, ne tubala bibèjibeji byètù ne tutèèleja bumvwiji bàà nguumù, ne buloba ebu mbukwàciibwe mpindyewu ku bukòòkeshi bwà makolè àbidi manène à nyumà. Ne ônsò àbidi mmakolè à butèndeleedi. Kàbidi ndi ngiàtabuuja ne mu mutancì mukesè emu makolè manène aa neàfike ku diteetangana dyà makàndà dyà ndekeelu. Ne makolè wônsò àbidi manène aa àvwa maleejìibwe mu bânà bâbidi bàà Izàkà aba. Mûshindù mene ùvvà Nzambì, mu lungènyì Lwèndè lùdì kalùyì mpwìlù alu, ùkaavwa mananè kutüleejila bintu byônsò ebi mu mundìdimbi; bwà twamòna mwà kumanya ku bintu ebi, ne ditwìshiibwa, cìdì citwindile kumpàla. Mutàmba kucipàtwila patòòke, mu mûshindù wà ne Nzambì ne Dìyì Dyèndè, ne bufùki ne Buloba bwèndè, mbitambe kulongolodiibwa bipwàngàna byônsò pàmwè, mu mûshindù wà ne nànsha ngè–ngènzàmpèkààtù ùdi mwà kumònà ne cintu kampànda cidi cyàmba kwenzeka. Nzambì ngudi mucyakàje mûshindù awu. Kakwèna muntu nànsha umwe wàpeta pàà kubingila to.

¹⁰ Mpindyewu tudi tumònà mu bânà aba bâbidi ne pàvvwàbo, kumpàla mene kwà kulediibwabò, bàvwa munkaci mwà kulwishangana. Nànsha mùvvabi ne mamwàbò virgò awu... Bwalu, yêyè ùvwa virgò, Lebèkà mulenga uvwa musèlàngàne ne dimiinu dyà mulayì wà Nzambì awu, Izàkà; bwà ne bûbidi bwàbò bàvwa beena kwitabuuja bàà Nzambì bajidila, bûlè tèntè ne Nyumà, badyànjila kulongolwela dibàkà mene dyàkabàsangà pàmwè adi. Nzambì ùvwa mudyànjile kumanya cyôcì aci. Kàdi mmunyì mùvvà cintu bu nànkú mwà kulwila kùdì maamù umwe awu, kùdi taatù umwe? Umwe, muntu mubyamùbyàlè; ne mukwàbò, muntu mwîmpè mutàmbe; ne mûshindù mene ùvvà muntu mwîmpè awu ûmwèka bu mubì, ne mubì ûmwèka bu mwîmpè.

¹¹ Mpindyewu aci cìdi, cìtu nànkú misangu yônsò, ne necììkalè misangu yônsò ànu ndongamu wa Nzambì. Nzambì kêna mwà kushintulula ndongamu Wendè to. Bwalu, Yêyè ùdi ùvvija ndongamu Wendè mupwàngàne, bwalu cidi citùpà Cyèndè.

¹² Mu budimi bwà Edènà, mpèkaatù ùvwa mulenga menemene mu mûshindù wà ne wàkakòka ntèmà yà Evà kumuumusha ku bwakàne, kumutùmà ku mpèkaatù. Nènku mu budimi bùmwèbùmwè abu mùvwa mucì wà Mwoyi amu, mùvwa kàbidi mucì wà lufù.

¹³ Tudi bafwànyìne kucimanya leelù ewu bu mukenji wà dipangakana. Bwà ne, mwaba ùdi bwímpè, ùdi bubì; mwaba ùdi cyakàne, ùdi cyà mafi. Kashidi kèètù, nànsha bàmba ne nyùngulukilu wetù ùdi bishi, katwàkwikala bakùmbàne mwà kutàpuluka ne bwikadi bwà bintu ebi nànsha. Bwalu, Pôlò wàkamba ne: “Pândì njinga kwenza maalu mîmpè, dîbà adi ke didì bubì bwimanepu.” Ngènzàmpèkààtù kadyàkukùmbana mwà kutàpuluka ne mwena Kilistò nànsha, ne mwena Kilistò pèndè kàkukùmbana mwà kutàpuluka ne ngènzàmpèkààtù to. Nekwìkalé ntèmù mwaba awu wa bwakàne, ne bujaadiki bwà mashimi, misangu yônsò. Nènku udi wudyènzelà disungula dyèbè. Bûdì naabù mbwà kusugula luseke lùmwè anyì lukwàbò.

¹⁴ Kàdi mu bânà bàbìdì bàà balùme aba, bìvwa bìkèmesha bwà kumanya cyôcì aci, kumpàlè kwà kulediibwabò, bônsò bàbìdì dimiinu dîmwèdimwè adi, dyumukila ku Izàkà, uvwà wa mulayì awu. Mpindyewù dîleesònà dyètù ndile ndambù, nènku ndi njinga kupeta nshindameenù mukùmbane mu mùshindù wà nwàmòna mwà kuumvwa menemene cîndì muswè kwamba. Nènku mwânà wa kumpàla, Esawù, uvwa mulediibwe awu; tudi tujandula ne kabàvva ànu bàkòkangana ne bàlwanga munda mwà mamwàbò cyanàànà to, kàdi bàkapàtuka munda mwèndè, bènda bàlwangana, Esawù mu dipàtuka dyèndè, ke Yakòbò kumukwàtaye ku cikànkanyì. Nènku bàcidì munkacì mwà kulwangana.

¹⁵ Ne mùshindù mene, ne mùshindù ùvvwàbo ne cyà kufùmina kùdì taatù anyì maamù, bàpwàngàne, bakezùke, basungula, bàà cijila, badilàmbùle abu! Pa nànku bwà kucishìndika, ne, Nzambi ùdi ùbiikila ku disungula. Cidi ne cyà kwikala nànku. Nànsha bàmba ne tatwèbè ne mamwèbè bàvwa bîmpè bishi, balenge bàà bishi, nànsha bàmba ne tatwèbè ne mamwèbè bàvwa beena Kilistò bàà bishi, bìdi ànu bilààle kùdì wêwè bu muntu nkààyà, bwà diimana dyèbè kumpàlè kwà Nzambi. Dîleesònà edi dìdì dîlongesha aci, ne bôbò, bânà bônsò bàbìdì abu, kùvwa mene ku disungula ne dibìikidìibwa dyà Nzambi, taatù ne maamù, mukàjì virgò ne mulùme wa cijila, bàvwa ndekeelu wa byônsò mu dimiinu dyàbò amu mupàtùkile Yesù Kilistò. Ùvwa mulediibwe bu ewu uvwa mubiìke ku bafwè. Ùvwa muteciibwè, tatwèndè uvwa kumpàlè kwèndè awu. Nènku yêyè ùvwa mulayìibwe, ku dimiinu dyà Izàkà edi, bwà ne buloba bujimà bùvwa ne cyà kusùngidiibwa. Nènku mupàtùkile munda mwà muntu wa mùshindù awu, ne mashi èndè matàmbe kukezuka mu mùshindù wà ne Nzambi kàvwakù mwà kwanyisha nànsha ne mwena Peleshètè awu alenge maamù awu nànsha, paanyimà pàà Abraham mananè kumupèèshayè. Nzambi wàkanyoooka nzùbu wendè ne bipùpu, e kwambayè ne: “Wêwè’s udi mwenze ànu bu muntu mumane kufwà,” mulamè musùlù wà mashi awu kezukezu. Ne yêyè Lebèkà awu, mwakàne awu, wa cijila awu, maamù mutùma kùdì Nzambi ne mubiìkila kùdì Nzambi.

Ne kuumukila ku dimiinu dyà cijila adi kupàtukamù muntu mupidyè diitabuuya ne mwena kwitabuuya. Nwamònù anyì? Pa nànku mbilààle ku dibììkila dyà Nzambì, disungula dyà Nzambì.

¹⁶ “Ne kumpàlà kwà yônsò wa kudibo kulediibwayè, Nzambì wàkamba ne: ‘Ndi munange Yakòbò ne mukìnè Esàwù,’ kumpàla kwà ní nganyì wa kùdibo kwikalayè muledìibwe.” Pa nànku mmunyì mutùvvà mwà kudyùmvwa. Muntu kampànda udi Nzambì mwakùle nèndè ne mukubìikile bwà kulwa ku mèèsà Èndè ne ku Nzùbu Kwèndè, ne kwikàle mwân’Èndè wa balùme anyì wa bakàjì, kakwèna cintu nànsha cìmwè citàmbe aci bunène to.

¹⁷ Bâna bâà balùme bàbìdì aba, twêtù mwà kujooja ngiikàdìlù wabò, umwe wa kùdibo ùvwa wa nyumà, mwinè awu ùvwa Yakòbò. Ne muntu wa musunya awu ùvwa Esawù. Kàdi bàvwa bônsò batèndeledi. Nènku cintu cìmwècimwè aci ncyènzèke munda mwà bikondo, wa musunya ne wa nyumà.

¹⁸ Esawù ùvwa ùleeja muntu wa pa buloba, wa mubidi, mweyèmène ku butèndeledi, kàdi kàyikù ùkòòkesha to. Munda mwèndè kamùvwa cyà dyenza nànku to. Yéyè kàvwa mwà kucyènza to. Munda mwèndè kamùvwa cyà kubànda kupìta bintu byà pa buloba, cintu cyà musunya nànsha.

¹⁹ Kàdi, Yakòbò, bìvwa ànu bipeepèle bwà yéyè kucyènza. Mpindyewu, Yakòbò, kiipàcìlà kàmwèpelè kàvwà naaku Yakòbò, kàvwa ne yéyè ùvwa ùjingajinga bwanàbutè abu, nànsha mubùpetà mùshindù kaayi, cikòlà àbùpetà.

²⁰ Ne mwinè nyumà wa dileediibwa dìmwè adi ùcìdi ànu muleejìibwe pa buloba apa leelù, ne mmutàngìle ku mpwìlàmàmbù mpindyewu: mwena kwitabuuya wa nyumà; ne muntu wa musunya, mwena kwitabuuya wa musunya. Muntu nànsha umwe kàvvakù mwà kwamba ne kabàvwa batèndeledi to. Bàvwa batèndeledi. Kabàvwa bâmbé ne umwe ùvwa ùsadila “lupìngu” ne mukwàbò ùsadila “Nzambì” to. Bàvwa bônsò basadidi bâà Nzambi.

²¹ Mpindyewu, filaayi ntèmà yônsò ku Mifùndu mpindyewu pa cyena-bwalu eci, bwalu ndi mutwishiibwe ne necìnùkwacishe menemene. Nwamònù anyì? Mpindyewu: “Ki mmuntu yônsò udi wamba ne: ‘Mukalenge, Mukalenge’ wabwela to, kàdi ewu udi wenza diswa dyà Taatù Wanyì udi mu Dyulu.”

²² Mpindyewu bu nwénù mwà kumònà, Yakòbò ùvwa ne cintu cìmwèpelè cìvwàye ùjinga, bwalu, bilondèshìle Dìyì, mabènesha ne ci—cintu cyà mushinga bìvwa bilààle mu bukenji bwà bwanàbutè. Nènku, Yakòbò, aci ke cìvwà kèndè kiipàcìlà kàmwèpelè, cintu cìmwèpelè cìvwàye naaci mu meeji èndè cìvwa cyà “kupeta bukenji bwà bwanàbutè abu.” Kàdi Esawù wàkabùdyombola. Yéyè mene uvwa naabu awu, wàkabùdyombola, anyì wàkabùfwa bundù. Kàdi Yakòbò ùvwa

ùbùjinga kàyì ùcyùka mùshindù ùvvwàye mwà kubùpetà nànsha, yéyé ùvwa ùbùjinga.

²³ Ke mùshindù ùdìbi nànkú bwà mwena kwitabuuja wa nyumà leelù ewu. Kènà ùcyuka mùshindù unùdì numuseka nànsha, nànsha nwénù bamwelùlwile bìshi, nànsha yéyé ne cyà kwenza maalu àmwèkà à macimbu bìshi ku mésù kwà ngeelèlù wa meeji wa musunya. Kiipàcile kèndè kàmwèpelè mbukenji bwà bwanàbutè abu. Mmuswe kufika kùdi Nzambì, bwalu mmuledìibwe naaci munda mwèndè. Kènà mwà kupanga kucyènza to.

²⁴ Yakòbò mbwena kwamba ne: “munyèngyanganyi wa mwaba ku bukolè” anyì “mushimyanganyi.” Kàdi paanyimà pàà mumanaè kupeta ne mwangàte bukenji bwà bwanàbutè, wàkashintuluka. Adi dishintuluka’s, ku cyà musunya. Wakabiikidiibwa díba adi ne, Yakòbò, “mwâna wa mfùmù ne Mukelngé,” uvwa mulwangàne Nendè.

²⁵ Mwena kwitabuuja wa musunya leelù ewu ùdi wàmaba ne: “Kaa, pândì ànu nya mu èkèleeyiyà ne ngenza cìdì cijaalame, kùdi dishìllangana?” Awu’s ke musùmbà wà Esawù. Úcìdi ànu wèlulwila ne ùdyombola bukenji bwà bwanàbutè, Kènà ùbùcyùka to. Kàdi Yakòbò ùvwa mubùnange.

²⁶ Ne mulùme wa nyumà leelù ewu, ne mukàjì wa nyumà, udi musungula, mudyànjila kulongolola kùdi Nzambì bwà kufika ku Mwoyi wà Cyendèlèlè, bu byòbì bikèngela bwà kusùmbisha cyônsò cìdibo naaci, bu byòbì bikèngela bwà kukùpula dínà dyàbò mu mukàndà wônsò wà èkèleeyiyà wa mu ditùnga, bàdì ànu batùngùnùke ne kunanga bukenji bwà bwanàbutè abu. Ki cintu cimwèpelè cìdi ne mushinga bwàbò aci ne: “kupeta ànu bukenji bwà bwanàbutè abu,” kwajikì. Nànsha byòbì bikàle bìshi, nànsha byòbì bikèngela bwà kufika mu cipidì kaayì, byòbì bikèngela kupweka ku cyoshelu ne kwasa mwadi, buu-huu, ní bìdi bikèngela bwà bòbò kunyeemakana kutwà—kutwà—kutwà kwàka ne eku ne kwalùkila kukalongolola maalu, ne kusùmbisha cìdibo naaci, anyi—anyi kwimansha cyônsò cìdibo naaci ne kushààla beena lwendu ne beenyi, kabyéna ne bwalu to. Bòbò mbàswè bukenji bwà bwanàbutè. Ki cyônsò cìdi cìbàsànkisha aci, bukenji bwà bwanàbutè. Mpindyewu, kanùdyulu bantu abu to. Kabèèna mwà kupanga kucyènza to. Bàvwa badyànjila kulongolola bwà cyôcì aci, basungula bwàcì.

²⁷ Ne pashiìshe tudi tumòna ne bantu bàbìdì aba, wa musunya ne wa nyumà, ki mùshindù wùtùbi byenzèke misangu yônsò. Mùshindù awu ngùdìbi leelù ewu. Bitu misangu yônsò ànu mùshindù awu.

²⁸ Kaayinà ne Abèlè. Mu budimi bwà Edènà, pààkafùkiibwa Edènà, kùvwa mici yìbìdì bwà muntu kwenzayè disungula dyèndè. Umwe, wàkalwa wa lungènyi; mukwàbò, wàkalwa Mwoyi. Kùvwa bânà bàà balùme bàbìdì, Kaayinà ne Abèlè,

bônsò bàbìdì batèndeeli. Umwe wa kùdìbo ùvwa ùjinga Mwoyi wà Cyendèlèlè, ne wàkalàmbula Nzambì, ku diitabuuja, mulàmbù mwîmpè mutàmbe wà Kaayinà. Cifwànyikijilu cipwàngànè cyà maèkèleeziyà leelù ewu: èkèleeziyà wa mubidi, èkèleeziyà wa nyumà. Ne kakuyì mpatà to ndi munkaci mwà kwakula ne misùmbà yónsò yibìdì ayi mpindyewu mene, ne pàmwàpa ku mukàbà wà mèyi nengààkulè naabò binunu makumi.

²⁹ Kàdi, tàngilààyi, èkèleeziyà wa mubidi, cìdì ànu èkèleeziyà wa musunya. Kabàtu kacya bakùmbàne bwà kubànda ku mutù kwà kantu kakesè aku kàà ne “ndi mushààle wa mu èkèleeziyà. Mêmè tuyè mu èkèleeziyà, mêmè ngenza ne mwànyì mwônsò, ki cyônsò cìdì Nzambì ulòmba aci.” Mpindyewu, ki cintu cìmwècimwè cyàkenzà Kaayinà ncyôci aci. Wákaya kenza cyoshelu. Wákafila mulàmbù, wàkatwàla mamuma à mu buloba. Ke kwambayè ne: “Ki cyôcì eci, Nzambì. Aci ke citàmbe bwîmpè cîndì naaci. Anyi udi ucyàngàta anyì ucilekela.” Mùshindù awu ke ùdì mwena kwitabuuja wa musunya wìtabuuja leelù ewu. “Mukalenge, nenyé mu èkèleeziyà. Nenkashààle wa mu musùmbà mutàmbe bwîmpè ûndì mwà kupeta. Nemfutè mfranga yànyì kùdì èkèleeziyà. Nengènzè cìdì címpè. Mpindyewu, ki citàmbe bwîmpè cîndì mwà kwenza ncyôcì eci. Nengàmbulwishe bwà kusùmbilakù mukàjì wa mu lufwìlà makàlà. Anyì, nempèesheku bânà batekète bilàmbà byà kulgàta.” Byôbì abi mbîmpè, ncyèna ne cyà kubìdyula naaci to. “Kàdi ki cyôcì aci, kwàjiki. Wéwè muciswè, cyangàtaaku; Wéwè kùyì muswè to, Kwêna ne cyà kucyàngata to.” Mpindyewu, ki lwidì lwa èkèleeziyà wa musunya leelù ewu ndwôlò alu.

³⁰ Kàdi èkèleeziyà wa nyumà! Abèlè, ku dibuulula, ku ngâsà, wàkamònà dyàmàwmwà dyà cyôcì aci, ne ku diitabuuja yéyè wàkalàmbula Nzambì mulàmbù mwîmpè kutàmbe Kaayinà. Ne cìdi cijaadika bwakàne bwèndè, Nzambì.

³¹ Cintu cìmwècimwè aci kwenzekaci mu Ishàmèlè ne Izàkà. Umwe ùvwa wa mu musunya, ne mukwàbò ùvwa wa mu Nyumà. Umwe, wa mukàjì mupika; umwe, wa mukàjì mudishikàmìne.

³² Cintu cìmwècimwè aci cyàkenzekela Izàlèlè ne Moàbà, èkèleeziyà minène yibìdì midisange pàmwè. Ne pàvvà Izàlèlè ùjinga kuya ku mwaba wàbò mulaya, èkèleeziyà wa nyumà, cisàmbà cyà Yakòbò, Izàlèlè ùvwa mu njila; Bantu bàà Esawù bààkatwìlangana naabò, beena Moàbà, èkèleeziyà wa bukolè. Kàdi mulombodi munène wa èkèleeziyà, Baalàmà, wàkapweka bwà kwela mwanààbò mulawu, kàdi wàkasangana ne kàvwa mwà kwela mwanààbò mulawu to. Wàkapangila, ne bufofo bwà mêsù èndè, bwà kumònà ndongamu mudyànjila kulongolola, bwà ne, ne bwà kumònà Dìyì dyà Nzambì.

³³ Dyàmbedi: “Diitabuuja dìdi dìfùma ku dyumvwa, dyumvwa

dyà Dîyî dyà Nzambi.” Dîbâ adi mwena kwitabuuja ùdi ùDítèeleja, ùDjingulula, wènza maalu mùdìDi dyàmba. Muntu wa musunya neàDítèèlèjè, cyonà cyàDì, kàdi kàdyà... *Kutèèleja* mbwena kwamba ne “kuumvwa” Dyôdì adi. Kutàngila, nkushààla mutàngile cintu kampànda; kàdi *kucimònà*, “nkuumvwa” cyôcì aci. “Muntu yêyè kàyi muledìibwe cyàkàbidi, kêna mwà kumònà anyì kuumvwa Bukalenge bwà Nzambi to.”

³⁴ Mpindyewu, ki Izàlèèlè ewu wènda ùlwa, wènda ùbànda ne mulayì wà Nzambi, bwà ne bàvwa batàngile ku buloba bulaya. Kaciyi beena bupidyà to, kàdi beena kwitabuuja, beena kwitabuuja mu Nzambi umweumwe uvwa nendè Izàlèèlè awu, kupàtuka bwà kuteeta kwela mwanààbò mulawu, bwalu wàkamba ne mwanààbò, cyà bushùwà ùvwa muntu mubì bwalu ùvwa mwenzè bintu byàbûngì bìvvà bibì. Kàdi, nudi numònà’s, yêyè wàkapanga kumònà disungula.

³⁵ Cintu cìmwècìmwè aci ne Esawù ne Yakòbò! Esawù ùvwa ùmwèka bu muntu mutàmbe bwîmpè. Wàkasòmba pansi e kwenzayè bintu byà dinanga. Yéyè-yéyè wàkakòweleela tatwèndè mpofo mukùlakàje awu, kumupetela munyiinyi wà nyama wa ntolé ne kumukòwoleela, nènku ùvwa nsongàálùmè wa maalu mímpè. Bintu byàbûngì bìdi beena kwitabuuja bàà musunya bènza mu mulongo wa ntèndeelè, bàmbulwisha bisùmbù byà bantu, ne-ne bàfucila bantu mfranga yà mu lùpitaadì, ne bintu byà butèndeeli, kàdi kî ng’aci cîndì ngàmба to.

³⁶ Moabà ùvwa mwîmpè, ditùnga dinène, mwanààbò. Ne Yakòbò ùvwa mwenze bintu byônsò, ùvwa muntu muvilè diitabuuja; kàdi nànsha nànkù ùvwa ne cintu cìmwèpelè cìvwàye ùlumbila, cìvwa ncyà kupeta mulayì, bukenji bwà bwanàbutè abu. Ki Izàlèèlè ùlwàlwa ewu, bânà bàà Yakòbò, biikàle ne kiipàcìlà kàmwèkàmwè aku. Mpindyewu nganyì wâbinga?

³⁷ Baalàmà wàkiiibaka byoshelu mwandamutekète; mu Izàlèèlè kùvwa byoshelu mwandamutekète. Baalàmà wàkalàmbula milàmbù mwandamutekète yà nyama mikezùke; Izàlèèlè wàkalàmbula milàmbù mwandamutekète yà nyama mikezùke. Nànkù, bwà pa kutangila ànu mùvvàbo babyènza bu mishìngà, Moabà ùvwa pèndè mutèndeeli ànu bu mùvvà Izàlèèlè amu, Esawù mutèndeeli ànu mùvvà Yakòbò amu, ne Kaayinà mutèndeeli ànu mùvvà Abèlè amu. Kàdi, bwalu’s mbulààle ku disungula.

³⁸ Bufofo kaayi’s wè! Mùshindù mwinè ùdì bânà bàà Esawù mpofo’s wè, mu ngaakwìlù wa nyumà, beena Moàbà, bàtàngila Izàlèèlè mu cibandabanda bàmba ne: “Bàtàngìlaayi. Kabèèna dìngumba to. Bàdi musùmbà wà bantu bavile diitabuuja. Mbasòmbele mu ntenta. Kàdi twêtù tudi ditùnga dinène. Mbenze bibì. Bàà bwalu abu kabàyi ne bulongolodi munkaci mwàbò nànsha. Bàdi ànu munkaci mwà kwenda kujèmbelela,

bènda bâlonda mupròfetà.” Kàdi bààkapanga kumònà Nyòka wa Cyamù cyà kabanda ne Lubwebwe lutuuta kumpàlà kwàbò. Wàkapanga kumònà babìikidìibwe bwà kupatuka abu, musùmbà musungula ùvvà wènda ùlonda dìyì dìtùmà dyà Bunzambì dyà Nzambì batàngile ku buloba bulaya.

³⁹ Mùshindù awu ngùdìbi leelù ewu. Bàdi bàmba ne: “Mmusùmbà wa bansantu babùnguluki bàà mu malaba. Mmusùmbà wa bantu bàdi *cikampànda, cikansanga, anyì cikankènga*.” Kàdi bàpanga kumònà ne bàvwa bènda bâlonda bulombodi bwà Dìyì dyà Nzambì.

⁴⁰ Izàlèèlà ùvwa mu njila mutàngile ku buloba bulaya. Nzambì, mu Dìyì Dyèndè, ùvwa mwènze mulayì.

⁴¹ Yakòbò, cyàkamusàkà bwà yéyè kusungula bwà kupeta bukenji bwà bwanàbutè abu, nànscha cinyì cyenzèke, yéyè ùvwa muswé ànu bwà kubùpeta, bwalu yéyè ùvwa mumanyè ne bukenji bwà bwanàbutè abo bùvwa bulamè mabènesha. Bùvwa bulàme mwoyi. Kààkacyùka mùvvwàbò bùlwa to, cikòlà àbùpeta. Ki cìvwà cintu cyà mushinga. Cipidì cìvwabò mwà kulwila aci, kacìvwa ne bwalu to. Ùvwa mubùswe. Nènku ùdi ne cyà kubùpeta. Nènku kubùpetayè. “Bàà disàンka ng’aba bàdi ne nzala ne nyòòtà yà bwakàne, nebùujiìbwè.” Ùvwa mu njila wendè, ne ùvwa wènda ùbùlonda, ne wàkabùpeta.

⁴² Izàlèèlà ùvwa mu njila wendè mutàngile ku buloba bulaya. Nànscha bàmba ne beena Moàbà bàvwa bûngì bishi ne milawu yàkateetàbo bwà kubèèla, bàkashìdiimba too ne mu buloba bulaya.

⁴³ Kàdi leelù ewu kanwàdyà... nànscha bàmba ne mbàpetè mikenji bûngì bishi, nànscha bakèngèshiìbwè misangu bûngì bishi, nànscha bakèngèshiìbwè misangu bûngì bishi, nànscha bambe bintu bibì byà bishi, nànscha babìikile misangu bûngì bishi ne “bansantu bàbùnguluki bàà mu maloba” nànscha bambe bintu bibì abi misangu bûngì bishi, èkèleeziyà neàye ànu kumpàlà. Ùvwa ne cyà kuya ànu kumpàlà. Nkushààla kwà mu Dìyì dyà Nzambì.

⁴⁴ Musangu kampànda bamfùmù bàbìdì bàkadìkungwija pàmwè. Umwe wa kùdibo ùvwa Aakàbà, mubì wa wòò, mukwàbò yéyè ùvwa Yèhoshàfàtà; èkèleeziyà wa nyumà, èkèleeziyà wa musunya.

⁴⁵ Aakàbà ùvwa mwena kwitabuuja wa ku mikàlù. Ùvwa ne baprófetà. Kabàvwa beena bupidyà to. Kabàvwa beena bupidyà to. Kabàvwa batèndeleedi bàà mpìngù to. Bàvwa baprófetà bàà beena Izàlèèlè, kadi bônsò bwàbò bàvwa balongèshiìbwè ne badìshììbwè ne bavwàdìkìibwe kùdì mfùmù Aakàbà. E kushààlací bu mwaba ùvvwàbò ne nshìndameenu wa cìdììdì cyônsò.

⁴⁶ Yèhoshàfàtà kubweløyè, ùpweka, e kwenzayè cipungidi, cìdì cilèma.

⁴⁷ Kanwèna ne cyà kuswìkakana ne beena bupidyà nànsha. Nànsha byà kumònà lufù, ni mmu mùshindù kaayì, katwèna ne cyà kufunda ménà ètù mu mikàndà mu èkèleeziyà yìdì kayìyì yìtabuuja Èvànjeeliyò mu kabujimà nànsha! Nenùbwelè mu lutàtu.

⁴⁸ Kàdi bàkabwela mu lutàtu. Ki muntu mwakàne ewu kwambayè ne: “Kabìvwa bìkèngela twêtù kwanji kukonka Mukalenge dyàmbedi, bwà kujandula ní bìvwa bìkèngela twêtù kuya ku Laamòtà-Gilàda anyì?”

⁴⁹ Mpindyewu tàngilààyi nùmòne mùvwa ndongamu ewu ùmwèka. “Laamòtà-Gilàdà ngwetù twêtù. Neintu cyètù, kàdi beena Suliyà mbabùnyènge Nzambì udi ne mwoyi. Twêtù katwèna mwà kubànda ne kwangata buloba ebu anyì?” Kàbidì wàkenza muyuuki awu mulenga be, ne mulondàngàne ne mikenji, mwakàne be, mu mùshindù wà ne Yéhoshàfàtà wàkawítaba.

⁵⁰ Nènku, leelù ewu, bantu bàdi mwà kwimana mu cyambilu ne muyikì mukwàtakaja wà dimanya dyà mu mitù, ne dilonga dyà túlaasà, too ne pàdìbo mwà kuumusha Bukolè bwà Nyumà Mwímpè kule ne Bible ku dyumvwija. Bàdi mwà kuumusha dyondopa dyà kùdì Nzambì ku dyumvwija. Bàdi mwà kuumvwija dyakula dyà mu myakulu ne dyandamuna, bàdi mwà kuumvwija dibatiiza dyà Nyumà Mwímpè, ne ndyà ditükù dikwàbò.

⁵¹ Kàdi muntu udi musungula kùdì Nzambì, muntu... “Mikòòkò Yànyì mmimanyè Dîyì Dyànyì.” Wéwè ne disungula dyà Nzambì adi pambidi pèèbè, kadyàkukulendwishaku to.

⁵² Yéhoshàfàtà kwambayè, mfùmù mwakàne awu kwambayè ne: “Kakwènakù mupròfetà, bwà twêtù kukonka Mukalenge anyì?” Aakàbà ûvwa wènda ùya kàyì ùkonka aci to.

⁵³ Mùshindù awu ke wùdì èkèleeziyà wa musunya wènza leelù ewu. Kaa, bàdi ne sèminérè myûlè tèntè ne bayiishi, bantu banène, balongeshi banène, beena mamanya à mu mitù, beena meeji matwè, bàtâbèèlè, kaa, ekèlekèle, kule menemene ne—ne bàtâbèèlè bàà mu èkèleeziyà wa mu-...anyì èkèleeziyà wa nyumà.

⁵⁴ Mu matükù à Noà, mu matükù awu, tàngilààyi èkèleeziyà wa mubidi. Bâvwa cinyì? Beena maalu à mamanya, biibaki, bantu bàà meeji matwè. Kàdi basungula, Enòkà ne Noà, bâvwa balami bàà mìkòòkò ne baabidimà, bantu bapwekèle, kabàyì balonge túlaasà nànsha, kabàyì bàà meeji matwè to, kàdi bamanyè Nzambì wabò; cintu kampànda munda mwàbò amu, cinyunga, cibiìkila. Netüfikèku mu katancì emu.

Mpindyewu, ki Yéhoshàfàtà kwambayè ne: “Kakwènakù mupròfetà anyì?”

⁵⁵ Kaa, mu bushùwà bwà bwalu, bàà musunya's bàvwa naabò. "Ncyà bushùwà menemene, tudi naabò. Ndi ne sèminérè lwà kwinshì eku, bapàtemù tèntè."

⁵⁶ Kulwabò ne nkàmà yìnaayi bulubulu. Mpindyewu, aba kí mbeena bupidyà to. Mbakuukwidi bàà Yéhowàh Nzambi. Kulwabo, e kwambabo ne: "Anji tùpèèshaayiku katancì kakesè nènku netwambè cipròfetà." Nènku ke bôbò bônsò kudisanga pàmwè. Ki kwalukilabò ne "Diyì dyà Mukalenge," kí bôbò kwamba ne: "EMU MMUDÌ MUKALENGE WÀMBA" Bapròfetà bàà beena Izàlèèlè. "EMU MMUDÌ MUKALENGE WÀMBA. Bànda ùya, Mukalenge ùdi neebè. Nènku neùkwatè Laamòtà-Gilàdà, bwalu ngwa Izàlèèlè bulelèlè. Ne umwe wa ku balombodi kudyenzelayè nsèngù yìbìdi minène yà cyamù cifiìke, bu cileeji, ki kubangaye dipuusa. Kwambayé ne: "Ne cyôci eci newùpuusè Izàlèèlè... anyì newùpuusè Beena Suliyyà kubápátula mu Laamòtà-Gilàdà."

Kàdi, Yéhoshàfàtà, cintu kampànda munda mwèndè!

⁵⁷ Kaa, ndi ntèkemena ne Nzambi ùdi ùtèèka eci mu mwoyi wèbè. Kí ncintu kampànda cyúdì mwà kudipetela ku dilonga to. Kí ncintu kampànda cyúdì mwà kudipetela ku dibala to. Ncintu cìdì Nzambi, ku disungula, wènza bwèbè wèwè. "Kí ng'ewu udi unyeema anyì ewu udi uleej-... N'Nzambi udi uleeja luse."

⁵⁸ Ki Yéhoshàfàtà ne: "Mbantu balwàte bîmpè be." Kakuyì mpatà to wàkamba cintu kampànda cyà mùshindù ewu: "Bàdi ne meeji, ne mbantu bàà meeji matàmbe kutwa bânkààdìku mûmvwè kacyà. Mbalongeshìibwe mu kantu kwônsò. Kànsanki kààbò kàdi diyì dìmwè. Bàdi ne bwobwùmwè bunène munkaci mwàbò. Kàbìdì bàdi ne meeji matwè, kàbìdì bàdi ne Bulelèlè bwàbûngì kùdìbo aku."

⁵⁹ Ntùpàkànyì yônsò eyi yìdi ne Bulelèlè. Mafi manène menemene àkaadì mambìibweku àvwa ne byà pa lukàmà makumi citèèmà-... [Katùpà kàà mukàbà wà mèyì munda mutupù—Muf.] byà Bulelèlè munda mwàwù, mafi àkashimàbo Evà kùdì Satàànà awu.

⁶⁰ "Kaa, kùdi Bulelèlè bwàbûngì mu bìdìbo bàmba, kàdi kakwènakù mukwàbò kàbìdì anyì?"

⁶¹ Èè, nudi nwela meeji ne muntu awu wàkamba cinyì? "Pèètù naabò nkàmà yìnaayi mijimà mwab'ewu, bàà meeji matàmbe kutwa, batàmbe bwîmpè? Kabèèna pambèlù apa mu cipèèlè emu bënda bânyeemakana eku ne eku bavwàle bu kí mbavwàle, badijingile bisèbà byà mikòòkò mu cimònò, anyì cintu kampànda to. Mbantu bândì mudiìshe, bândì mulongèshe. Kí mbantu bàdi bapangè ABC to. Mbamanyì bàà mabàla, ne mbamanyè cintu. Bàdi bàshààla munyà ne butùkù, munkaci mwà kubala mivùngu ne bipròfetà. Mbamanyè cìdì cîmpè. Kàbìdì nkààdi naabò tàyâdì. Kàbìdì mbiimàne mwab'ewu ne mwoyi ùmwè, nkàmà yìnaayi mijimà, bàmba ne: 'Bànda, Mukalenge ùdi neebè.'"

⁶² Kàdi bu mêmè mwà kubala meeji à Yéhoshàfàtà katùpà kípì cyanàànà: “Kùdi ànu cintu kampànda cídì kaciyì mu cyôcì to,” mùvwàye mufwànyìne kwamba. “Kùdi ànu cintu kampànda cídì kaciyì cìmwèka cijaalàme to. Kakwènakù mukwàbò nànsa umwe, mwaba kampànda ànyì?”

⁶³ “Kaa,” mwàkambàye, “èyowà, kùdi mukwàbò, kàdi kî ngwa mu bulongolodi ebu to. Yéyè mmuntu wa wèndè mùshindù. Údi ànu muntu mupidiyè diitabuuja.” Mmwenze bu mùdì Yakòbò amu. “Kàdi tudi bafwànyìne kumukonka. Bàdi bàmba mùdàyè mupròfetà. Kàdi ndi ngèèla aci mpata, bwalu ùsòmbela ànu ùngela milawu misangu yônsò, wàmba ne cikampànda, cikansanga, ànyi cikankèngà, anyì kacea kàtukù pèndè mungambilékù cipròfetà cyà címpè.” Mmunyi mùvwàye mwà kukwambilaci? Nwamònou anyì?

⁶⁴ Ki kwambabò ne: “Lwâyi tùkamwangàtaayi. Yéyè’s mmwâna wa Yimula.” Pa nànkú e kuyabò kamwangata.

⁶⁵ Ki muntu kampànda kutwìlanganayè nendè mu njila, kwambayè ne: “Mpindyewu, wêwè ambà cintu cìmwècímwè cídibò bàmba aci. Údi ne cyà kumvwangana ne nsangilu. Wêwè kùyi mwenze nànkú to, dyàkabi dyèbè!”

⁶⁶ Yéyè ne: “Nêngâmbè ànu cídì Nzambì ùtèèka mukana mwànyì bwà kwamba aci, kí ncìngà cintu to.”

⁶⁷ Pashiishe yéyè mumanè kufika kuntu aku, nènku bààkamupèèsha dilòòlò dìmwè, yéyè kwamba ne: “Bànda, kàdi ndi mumòne Izàlèèlè mutangàlakè bu mìkòòkò kayiyì mulami nànsa.”

Ki Aakàbà kwambayè ne: “Ncìvwa mukwàmbile anyì?”

⁶⁸ Mpindyewu, nkàwékù kùdi nkàmà yìnaayi yìlwisha ùmwèpelè. Nkàmà yìnaayi milongèshiibwe, yà meeji matwè, milonge kàalaasà, balùme bàà lungenyi lutwè bàlwishangana ne cinyònga cikesè cìmwèpelè, mutùdi bafwànyìne kumubiìkila, Miikà. Muntu ùmwe, kàdi nànsa nànkú yéyè muntu umwe awu ke uvwa ne Dîyî dyà Mukalenge, ke cìvwà cyènza dishìllangana aci. Yônsò wa kùdibò ùvwa wa mashimi, byàkadìmwènèkèla patòòke ne bìvwa byà mafi. Bwà cinyì Miikà yéyè ùvwa mushìllàngàne nànkú? Byàkakèngela bwà kwikalayè mupèlè, bwà kwikalayè mushìllàngàne anyì? To. Kùdì... Cyàkenzà ne Miikà ikalè mushìllàngàne ncinyi, mpààkashààlaye ne Dîyî. Dîyî dyà Nzambì ki dyàkashààlaye naadì.

⁶⁹ Mpindyewu mbilayììbwe ne, mu matùkù aa: “Nzambì neàpongololè Nyumà Wende.” Mmulayile kùdi Danyèlè, ne: “Bantu, mu matùkù yìkalà dibwe dituuta cimfwànyì ku makàsà, bantu bàdì bamanyè Nzambì wabò nebénzè maalu à kukèma.” Cipròfetà paanyimà pàà cipròfetà! Ne sèminérè yônsò, bàà pa buloba, kabèèna mwà kubyùmusha to. Nzambì ke wacyènza, nànsa bishi, ne bantu nebàcilondè. Nwamònou anyì? Wa

musunya ne... Èkèleeziyà wa mubidi ne èkèleeziyà Mutàmbe-mfùkilu. Nudi numònà's, Dìyì dìdi dìfila dishìllangana.

⁷⁰ Ke cìvwà Yakòbò wèla meeji aci ne: "Nènku nànscha bàmba ne ncinyì, ndi mumanyè ne ncyènàku mwà kubènèshiibwa pàndì nciyi mubàkùle bukenji bwà bwanàbutè abu to. Bukenji bwà bwanàbutè abu ki bungìkalà mêmè ne cyà kupeta."

⁷¹ Nènku, kàdi Esawù wàkabùkìna, ne bâna bèndè bàcìdi ànu bènza cintu cìmwècìmwè aci, too, ne leelù ewu. Mbabùkine. Bitu ànu nànku misangu yônsò.

⁷² Dìbà kanà dyônsò dìdìku ditàbuluja, bìsòmbela bìlela ànu mapàsa. Adi ndiyì dyà kadiwu dyúmè, kàdi ndilelèlà. Pààkenzekà dilediibwa munda mwà, mwà Izàkà ne Lebèkà, dyàkatwàla mapàsa. Pààkafukiibwa buloba, bwàkalela mapàsa, mici yìbìdì. Ne pààkalediibwà Kaayinà ne Abèlè, cyàkatwàla bàbìdì. Pààkalediibwà Ishàmàele ne Izàkà, cyàkatwàla bàbìdì. Ne dìbà dyàkalediibwà Esawù ne Yakòbò, cyàkatwàla bàbìdì. Umwe wabò, wa mubidi (umwe wa kùdibo, wa pa buloba); mukwàbò awu, Mutàmbe-mfùkilu. Nènku umwe ùvwa mutàngile ku byà mu bufùki, wa mamanya à mu mutù; mukwàbò yéyè ùvwa wènda ku bulombodi bwà Nyumà. Bìsòmbele misangu yônsò ànu mùshindù awu. Pààkalwà èkèleeziyà wa ba-Luthériens...

⁷³ Twàngatààyi Mpenta, dyàmbedi. Tàngilààyi dilediibwa dyà Mpenta. Dyàkatwàla ditàbuluja dinène, dyà bukolè dyàkatàmpakanà pa buloba bujimà bùdì bumanyìke, Mpenta. Kabyàkanènga to paanyimà pàà Mpenta too ne mwàkafikà Pôlò mwinè ku dyamba, ne: "Nekùjuukè bantu munkaci mwàbò, ne bintu bikònyàngàle, ne nebàjinge bwà kuumusha bantu kùdì Nzambi." Ke cyôcì aci menemene cìdìbo bênzè. Cìdi cilela bìbìdì.

⁷⁴ Pààkalediibwà èkèleeziyà wa ba-Luthériens, Martin Luther wàkapàtula ditàbuluja dyà nyumà. Kadyàkanènga to too ne mùvvwidilè Esawù, mumutwè ànu mu nyimà, ne kucìvwijayè bulongolodi. E kulelacì bìbìdì.

⁷⁵ Pashìishe paanyimà pàà cyôcì aci, kulwaku ba-Méthodistes, John Wesley, ditàbuluja dyà nyumà. Kàdi paanyimà pàà cyôcì aci, kulwaku bulongolodi, kucìvwijabo bulongolodi. Nenku kulelacì bìbìdì.

⁷⁶ Nènku paanyimà pàà cyôcì aci, kulwaku Mpenta, ditàbuluja. Nènku mpindyewu mbacìvwije bulongolodi, ne mpindyewu mbadilongolole bwà kwenzabo bulongolodi. Ne cìdi cilela bìbìdì.

⁷⁷ Kàdi dimiinu dyà nyumà dyà Nzambi udi ne mwoyi adi, nànscha mùdidi ne cyà kwikalà dipicì dyà ne njila amu, nànscha mùdidi ne cyà kwikalà dilalakanyì amu, dìdi misangu yônsò dilela ànu ditàpùluka. Esawù kàkashààla ntàntà mule ne Yakòbò to. Yakòbò mmwènzè ànu ùpetà bukenji bwà bwanàbutè

(Nzambì àtumbè), cyàkalòmba ditàpùluka. Nènku dîbà dìdì muntu... Nànsha wêwè wa mu èkèleeziyà kaayì, yéyè mwikàle wa musunya, ne baanyàneebè baùdì ùtàmbakana naabò, bantu banùdì nunàya naabò twarta, nubala naabò bibèjibeji byà tusùmbù twènù, ne bikwàbò; dîbà dyûdì upeta bukenji bwà bwanàbutè, cintu kampànda cidi munda mwà mwoyi wèbè ùdì ne nzala yà Nzambì aci, paùdì upeta aci, cidi cìbìikila cikèba ditàpulula. “Pàtukàayi munkaci mwàbò, ne ikàlaayi batàpulukè, mmùdì Nzambì wàmба.” Ditàpuluka!

⁷⁸ Èkèleeziyà ùdì ùsòmba mucyankàme. Nwamònú's, kêna mwà kutùngumuka to. Esawù ùvwa cifwànyikijilu cîmpè cyà mwena kwitabuuya wa musunya leelù ewu, kàyikù mwà kucìmuna maalu àà pa buloba to. Kêna ùcimuna bintu byà pa buloba to. Bâcidi ànu banange kwenza mafestò, kujà kwàbò kwà maja, banange kulaaba bilaabu, bakàjì's, kwísù kwàbò, ne—ne bâkôsa nsuki yàbò kàbìdi—kâbìdi bâlwàta tulàmbà tukesè twípì twà kalè; ne—ne balùme banange kuya ku nzùbu yà ditwila twarta, ne—ne kunwà mfwankà, ne kwela minèkù mikesè yà manyaanù; cìkòlà biikàle ànu bàà mu èkèleeziyà. Kacya kabàyì ànu bakùmbàna mwà kucìmuna bintu abi to. Nànsha Esawù kàvwa mwà kukùmbana to. Kàdi nànsha nànku, bwà kwikala mutèndeleedi, ùvwa ne cyà kwimanyina pa mmwènenu wa meeji à mu mutù. Ki cintu cîmwècîmwè aci cidi èkèleeziyà wènza leelù ewu. “Netùlwe bulongolodi kampànda. Netùdísangè bônsò pàmwè. Netwenzè kasùmbù kampànda, anyì kànsànkì, anyì cintu kampànda cyà mùshindù awu.”

⁷⁹ Nànnku awu ke mùdì èkèleeziyà ùkwàta mudimu leelù ewu, wa nyumà ne wa musunya, biikalè ànu byà mwomùmwè. Ki mbishintùlùke to, ne kabyàdyàkushintuluka nànsha.

⁸⁰ Cijila cyà Nzambì. Nzambì, bu mùdìye Nzambì, ùdi ùkùmbaja cyôcì aci, Yéyè mwinè. Bu kakùyì ngènàzàmpèkààtù to, kakùvwà kufwànyine kwikala... Kàvwa mwà kwikala Musùngidi nànsha. Kàdi Yéyè ùvwa Musùngidi ku cibangidilu, pa nànnku kakùvwà cintu nànsha cîmwè cìvwà cijimìne to. Ne byambìbwà Byèndè Yéyè bu Musùngidi, ki kulelaci ngènàzàmpèkààtù, kùvwà ne cyà kwikala cintu kampànda cìvwà ne cyà kusùngidiibwa. Kumpàla kwà kwikalakù cintu kampànda cisùngidiìbwé, kùvwà ne cyà kwikala cintu kampànda cijimìne. Ne bwakànè Bwèndè ne cijila Cyèndè! Bu ne kacya kakùvwakù kwanji kwikala—mubèèdì to, Yéyè kàvvakù mufwànyine kwikala mwondopi to. Kàdi kubangila ànu ku cibangidilu, ne ku cibangidilu, Yéyè ùvwakù kumpàla kwà cibangidilu. Yéyè ùvwa mwondopi. Pa nànnku kakùvwà cintu nànsha cîmwè cisaama to, pa nànnku cyàkalela mubèèdì, bwà Yéyè kumònà mwà kubòndopa, bwà kumwenza Yéyè mwondopi.

⁸¹ Mu Cipaapù cîmwècîmwè cyà Cijila amu mùdì mupàtùka lupàndu, mmupàtùka milawu. Munda mwà maamù umweumwe

ne taatù umwe mwàkapàtukà Yakòbò amu, mwàkapàtula Esawù. Nwamònù anyì? Nzambì. Yéyè këna mwà kushintulula ndongamu Wendè to. Bìdi ne cyà kuya ànu mwomùmwè. Bufuki bwônsò nebùbwelèmu. Bùdi ne cyà kubwelamù. Nûmvù cîndì muswè kwamba anyì? Bìdi bìkabwelamù. Kùdi ne cyà kwikala muntu kampànda mujimìne, udi ne cyà kusÙngidiibwa. Nènku bu kàkùyi kufwànyìne kwikalakù, Yéyè, Wendè... Yéyè bu MusÙngidi wàkenza cyôcì aci. Ndòndò ùdi ùbìikila Ndòndò.

⁸² Byênze bu mwânà wa balùme mutekète mwena bwalu bûntù ndonda abu awu, uvwa udyà ndundu wa ku crayons, ne ndundu wa ku dikàsà dyà díkalù, ùvwa ùkèngela soufre. Nènku bu mùvvwàku ànu cintu kampànda munda amu cijinga soufre, kùvwa ne cyà kwikala soufre mwaba kampànda, dyàmbedi, mwenjìubwe. Kùvwa ne cyà kwanji kwikalakù soufre dyàmbedi kumpàla kwà kwikalakù dijinga munda mwèndè. Nènku yéyè, soufre ewu, kudimwèneshayè kùdiye, díbà adi yéyè kulwayè ku soufre.

⁸³ Mùshindù awu ki ùdì Nzambì MusÙngidi. Nènku bìvwa bìkèngela kwikale cintu kampànda cijimìne, bwà Yéyè kucisÙngila, bwà kuMuvwija MusÙngidi. Ki cyônsò cìdici cyènza, nkupàtula Nzambì patòoka. Cintu cyônsò, cyônsò cìdì munda Mwèndè; ki mmu muysihi to, ki mmu èkèleeziyà to, ki mmu bulongolodi to, kàdi mmu Nzambì, bwà disungula kushààladi dimànè dipwàngàne. Nwamònù anyì? Mmu Yéyè. Èyowà. Ba-Luthériens...

⁸⁴ Ne pashìshe tudi tumòna ditàpulula dikwàbò, cìvwa ng'Abraham ne Lotà. Bàvwa bâna bàà muntu. Kàdi Lotà ùvwa mwedi wa meeji à musunya. Yéyè ùvwa ànu wènda ukebangana ne cintu kampànda cyà cinène, cintu kampànda ciikàle ne dibàlakana dyàbÙngì pambidi pààci. Ànu mùtù nsokò amu, mùndì mufwànyìne kwamba, ùdi wenda wipacila misangu yônsò ànu bintu bìdì bibàlakana. Nyumà awu kacya kàtu mwanji kulekela bantu to, leelù ewu. Nebendè bákèbangana ne... Bâyaaya mu cimenga, kàdi kabèèna mwà kwanyisha bwà kulwa mu kabutabuta bu aka nùnku to. Nwamònù anyì? Mbaswe bwà èkèleeziyà mutàmbe bunène udi mu cimenga amu, mpaasàtà wa mamanya à mu mitù, mùdì bantu bâdì balwàta bu kapènzù bâya, mùdì mutàngidi wa cimenga ùya, mu cimenga. Cìcidi ànu nyumà wa Esawù awu. Mu bulelèlè bàvwa ne makenji à bwanàbutè, ànu kwônsò eku, bâdìbìikila bôbò biinè mùdibo Èkèleeziyà, kàdi bâàkabùjìmìja bwalu bâàkabùdyombola. Kwêna mwà kufikisha bantu abu bwà kuyabò ku binù, ne kudila mwadi ne kulòmba Nzambì, kupàtuka ne kwenza masangisha à dyondopa, ne kutwàla dikèngeshiibwa dyà pa buloba, kupeta Nyumà Mwimpè to. Ne bôbò—bôbò kabâàkucyènzakù to. Bâdi bâcìdyombola. Bâdi bacibìikila ne “musùmbà wa bansantu babÙnguluki bàà mu malaba.” Ànu cìdì Bible mwâmbe ne nebènzè aci. Bâdi baciyènza bwalu ki ngiikàdilù wabò nyéyè awu. Nngiikàdilù's.

Ànu bu cikòlolò ne nkuci, ngiikàdlù yìbìdì. Bàdi bàcìjinga bwalu's ki cìdìbo. Kabàdyà, kashidi kààbò, kumònaku mukwàbò to, bwalu ki mbaledìibwe bwà kucìmòna to.

⁸⁵ Kàdi mukwàbò awu, kwêna mwà kumulama kule ne cyôcì aci to, bwalu ndisungula dyà Nzambì to. Yèyè mmuledìibwe bwà kwikalà mulùme anyì mukàjì wa nyumà. Cintu kampànda munda mwèndè cidi cicìjinga. Kaa, ndi ntèkemena ne eci cyäfikì mu mwaba utùdì mwà, unùdì mwà kumònà, cîndì—cîndì nswa kwamba, pânskaadì ncyöya mpindyewu apa. Mpindyewu Abraham . . .

⁸⁶ Vùlukààyi ne, bu mùvvwàbò kacya bààlamakane pàmwè, èkèleeziyà wa mubidi ne èkèleeziyà wa nyumà, kacya kabàtukù bapetè dibènesha to. Yakòbò wàkabèneshiibwa ànu pààkatàpulukàye ne Esawù. Ne Abraham wàkabèneshiibwa ànu pàtápùkìlàyè ne Lotà.

⁸⁷ Lotà ùvwa ne kaadisangisha kèndè kakesè kàà disambila aku mu èkèleeziyà wendè mwàmwa, mulongeshe bânà bèndè bàà balùme ne bàà bakàjì, ne bakwàbò. Kàdi ùvwa ne mwoyi wà mùshindù awu, wà mùshindù wa ne, pààkayàye bwà kwakula bwà cikondo cyà nshììkidilu, kumusekabò.

⁸⁸ Cintu cìmwècìmwè aci leelù ewu! Wêwè wakula bwà dyondopa dyà kùdì Nzambì ne bukolè bwà Nzambì, ne bikwàbò, bàdi bâbiseka. N'nyumà umweumwe awu. Ki nyumà yìbìdì minène ayi, mu cibadi cyà ntèndeelu, yìdì mibùcikile buloba; mwena kwitabuuja ne mwena bupidyà, mwena kwitabuuja ne mwena kwitabuuja wa budìngìbudìngì, muntu udi utentula mukwèndè awu. Mpindyewu pààkatàpuluka Abraham yêyè mwine . . .

⁸⁹ Nukààvwaku bamònè anyì? Yesù, mu dyakula Dyèndè bwà Dilwa, bwà Dilwa diibidì, Wàkamba ne: "Ànu mwàkadìbi mu matùkù à Noà, nebiikale bàdyà, bânwa, baselangana, ne bâsèleshangana." Kàdi pààkaakulàye bwà matùkù à Lotà, Yèyè kààkambakù cintu nànsha cimwè pa bwalu abu to. "Bu matùkù à Lotà," aci mbwà dibuulula.

⁹⁰ Tàngilààyi cyàkenzekà mu matùkù à Lotà. Kùvwa Lotà ku Sodomà kwàka, musòmbe mucyankàme, bilondèshìle mamanya à mu mutù, Kushààlayè ewu, umwe wa ku bantu banène bàà mu cimenga, nzujì, musòmbe mu biibi ùlumbulwisha bantu. Mukàjèndè ùvwa wa mu misùmbà yônsò yà bantu bàvwà mu cimenga amu ayi. Ne bânà bèndè bàà bakàjì, ne bônsò bwàbò, basèdìibwe munkaci mwà bantu bàà luumù, beena mamanya à mu mutù, balonge bapilùke, beena meeji matwè, batàlàme. Ne Abraham ùvwa musòmbèle mu ntentà mwinshì mwà mucì wà lusànga. Kàdi dîngà ditùkù e kubèndelabò bùbìdì bwàbò bwenyi.

⁹¹ Kàdi kùvwawa muysihi wa meeji à mu mutù wakapweka e kuyiishayè, ne kubàpàtula pambèlù. Tàngilààyi kùdì—tàngilààyi mukenji wà ne: “Pàtukààyi,” wàkambilàye Lotà awu’s.

⁹² Ne kàvvwakù mwà kubìikidiibwa bwà kupàtuka to bu kabùyì bwà luse lwà Abraham. Yéyè kwamba ne: “Ndi mwà kupeta bantu makùmi àtaanu, Udkìkù mwà kubàlama anyì? Ndkìkù mwà kupeta bantu makùmi àsàtù anyi? Ndiku mwà... Bu mêmè mwà kupeta dikùmi?” Ki pààkimanyinaye apu. Kàbidì kààkapetakù nànscha dikumi munkaci mwàbò to.

⁹³ Kabyèna bikèmesha to ne: “Ànu mwàkadìbi mu matùkù à Noà.” Vùlkààyi ne, Noà kàvva cifwànyikijilu cyà Èkèleeyiyà to; Enòkà yéyè ngùvwa cifwànyikijilu, ewu ùvwa kàyi mupicile mu dikènga dikolè nànscha, kàdi wàkatentemunyibwa kumpàla kwà dikènga dikolè kutwadijadì. Enòkà wàkaya Kumbelu, kààkapicila mu dikènga dikolè nànscha. Noà wàkapicilamù.

⁹⁴ Mpindyewu, tàngilààyi ne ntèmà yônsò mpindyewu patùdi tutùngunuka ne kubwela mu eci apa. Tàngilààyi nùmonè ne ncimanyinu cyà mùshindù kaayì cìvwà Abraham ne díkù dyèndè bapetè. Bààkapeta Citàmbe-mfukilu. “Abraham!” Mmunyì mwàkamanyàYe ne ùvwa Abraham? “Mukàjèèbè Sarah, ùdi penyi?” Mmunyì mwàkamanyàYe ne ùvwa muselàngànè, anyì ne ùvwa ne mukàjì, Sarah?

“Ùdi mu ntentà.”

⁹⁵ Mpindyewu, Muntu musòmbe mwaba awu, ùdyà munyìnyi, ùnwà mabèèle, ne ùdyà dyâmpà dyà matalà, “Mukàjèèbè Sarah, ùdi penyi?” Mmunyì mùvvwàYe mumanye cintu aci? Mmunyì mùvvwàYe mucìmanyè? Elàayibi meeji pa bwalu abu. Nudi nubìikila... Nwènù bantu bàà nyumà, swâyi bwà eci cinùbwèlè. Mmunyì mùvvwàYe mumanye aci, pàvvwàYe wènza maalu bu mwenyi, ne lupwishi ku bilàmbà Byèndè?

Nènku pààkambà Abraham ne: “Ùdi mu ntentà, paanyimà Pèèbè apu.”

⁹⁶ Ki kwamba Yè ne: “Nêngììkalè mwà...” “Mêmè, Mêmè,” mupinganyi muleeji muntu. “Mêmè,” Muntu ewu, Nzambi ùDimanyisha mu mubidi. Nzambi! Abraham wàkaMubiìkila ne Elohim. “Mêmè, Nénkumwènèkèlè. Nénkuumbajè mulayì Wànyì. Ne blondèshile cikondo cyà mwoyi, Nénnùmwènèkèlè, nènku nenùpetè mwânà wa balùme Ûmvwà munwambile awu.” Nènku Abraham, ne bidimu lukàmà; Sarah, ne bidimu makùmì citèèmà.

⁹⁷ Nènku Sarah, mumfundu mwàmwa mu ntentà; munkaci mwà ntentà yà mikese mitwé ku yinaayi ayi, ntentà munène ùvwa lwà mu ndekeelu. Paanyimà pàà bilàmbà bikùdika, ùvwa munkaci mwà kuteèleja. Yéyè kuumwà cyòcì aci. Nènku munda mwà mwoyi wèndè kufùkishayè mimwemwe, wàmba ne: “Mêmè ewu, mukàjì mukùlákaji wa bidimu lukàmà, ne mukalenge wanyì,” báyendè, “mukalenge wanyì, wa bwalu mukùlákàjì,

kàdi kwela meeji ne tudi bafwànyìne kuumvwa milòwu pàmwè kàbìdì, bu bansongà báçìdì bábwelelaku mu dibákà anyì? Kaa, mmunyì mùvwàci mwà kwenzeka?" Nènku kwenzayè bu wáfukishi mimwemwe.

⁹⁸ Ùvwa ne nyimà Wendè mwela ku ntentà. Kwamba Yè ne: "Bwà cinyì wäseki?" Kaa, mwanèètù, s'ki bwalu mbwôbù abu's!

⁹⁹ Tàngilààyi èkèleeyiyà wa musunya mùdìbo bënda bámuyiisha Èvànjeeliyò. Billy Graham wa cyena leelù ne bakwàbò abu kuntu kwàka munkaci mwà kuiisha Èvànjeeliyò ne: "Pàtukààyimù!" Kàdi bààkalwa anyì? To. Bakesè, bakesè, bakesè menemene.

¹⁰⁰ Tàngilààyi musùmbà wà Abraham, bàbìkkidìbwe bwà kupàtuka abu. Mpindyewu mònayi. Ne kumupèèsha Yè cimanyinu eci, ne yéyè kuMwitabuua. Ne Wákajìmina kumpàlà kwendè, e kuyayè. Kaa, mùshindù mena útubi misangu yónsò ànu ditàpuluka, babìkkidìbwe bwà kupàtuka!

¹⁰¹ Mpindyewu, nyumà yìbìdì eyi. Bwà kulwijakaja neenù, bwà kulwijakaja mpindyewu bwà kufika ku mwaba wànyì ûndì muswè bwà nwènù kumònà. Misùmbà yìbìdì eyi mmidisangè pàmwè, mu bikondo byônsò bipite, kwambwila ànu ku mbangilu mene kwà bikondo aku; èkèleeyiyà wa mu mubidi, èkèleeyiyà wa nyumà. Bâàkapicila mu Dipungila Dikùlukulu, bâàkapicila mu Dipungila Dipyadìpyà, ne báçìdi bënda bápweka too ne leelù.

¹⁰² Mpindyewu, kùkaadi kupìte bidimu bitwè ku binunu bìbìdì, e kulwaci ku katòngòbèlà, e kubàndaci mu bantu bâbìdì: umwe wabò, Yesù Kilistò; mukwàbò, Yudààsà Mpóngoloki. Mpindyewu, Yesù wàkamba bwà Dilwa, dyà Dilwa Dyèndè diibìdì, ne nyumà yìbìdì eyi yìvwa mwà kwikalà mishìllàngàne bikolè ne civwàye kale wàwa. Mpindyewu apa ki mwaba ûndì muswè bwà nwènù kulwàta bivwàlù byènù—byènù byà Butùmbi. Nyumà yìbìdì eyi neyíkalè mishìllàngàne. Bwalu, Sàtaanà wàkalwa kusòmbela mu muntu uvwa cidimba cyà èkèleeyiyà, Yudààsà Mpóngoloki, wàkasòmbela mu èkèleeyiyà wa musunya, ne ùvwa mulunda wa èkèleeyiyà cikondo cyônsò. Kàdi wàkabwela ne—ne kushimayè, anyì kweløyè meeji ne ùvwa munkaci mwà kushima mwanààbò. Wàkabwela kudingìdija bu ùvwa umwe wabò; kulabulayè bintu bîmpè byà Nzambi, kubwela bulùdi mu Nyumà, ùmweka bu nàñku, wàkaya kayiisha Èvànjeeliyò, ne kwipata badémonts. Kàdi munda mwèndè, díbà dyônsò, yéyè ùvwa Yudààsà, ànu kwônsò kwônsò eku. Bible mmwambè ne: "Wàkalediibwa mwânà wa dibütuka."

¹⁰³ Mpindyewu vùlukààyi ne, kùdi èkèleeyiyà wa musunya kale wàwa, Esawù, Bâfaalèsà ne Basàdokà.

¹⁰⁴ Kàdi tàngilààyi nsongààlùme ewu udi udyèlèla meeji nkààyendè ànu bu... Yéyè neéndè ne Mukenji ewu bwà katancì kakesè, kàdi ki mmuswè bwà kutwàPu byanza bikolè to. Nwamònú nyumà ayi anyì? Yesù wàkamba ne: "Neyíkalè

pabwîpì menemene ne cintu cilelèlà, neyìseeswishè Basungula mene,” Basungula, bu nwénù mwà kucimònà ne: “bu ne bìvwa mwà kwenzeka.” Kàdi kabyèna mwà kwenzeka to. Nwamònù’s, neyìseeswishè.

¹⁰⁵ Mpindyewu tàngilààyi, kàyì ànu èkèleeyìà wa musunya to, ewu udi mupàtùkemù, ngenzèlù wa ciibidilu wa èkèleeyìà wa musunya, musùmbà wà Esawù.

¹⁰⁶ Tudi bapetè mpindyewu musùmbà wà beena Yudààsà, bàdì ne budimù bwà wòò, beena budimù bwà wòò kutàmba, bafika too ne mu mabènesha. Ànu bu mu Ebèlù 6 ne 10 amu, mùshindù wàkambàye ne: “Bamane kushààlaku baabanyanganyi ne baalabudi bàà makolè à buloba bùlwalwà, ne benzè bintu byônsò ebi; bu ne...nènku dìbà adi pììkalàbi ne mbaakìdile dimanya dyà Bulelèlà, kàdi pashiishe bôbò babùbènge ku budiswile.” “Ku budiswilè,” ncinyì aci? “Kuvwija Mashi à cipungidi, àvwàbo bajidìibwe ku wòwò awu, cintu cìdì kaciyi cyà cijila to.”

¹⁰⁷ Anyishaayi nnupè cileejilu. Ki cyôcì eci. Ki muntu ewu’s, mmuntu mwímpè, nsongààlùmè mulenga kumònà. Mmubììkidiibwe, ùdi ùmvwa mu mwoyi wèndè ne mmuswè kwikalà mwambi. Èyo, ùdi wìtaba Yesù bu Musùngidi wendè wa sungsunga. Nnsongààlùmè mulenga kumònà, kakwèna muntu udi mwà kumubanda ne bwalu to. Paanyimà pàà cikondo, cyenabwalu cyà dijidiibwa. Muntu mulùme ùdi wàlakana pàdiye ùtàngila bakàjì apu. Yéyè... Cìdì munda mwèndè. Nwamònù anyì? Nènku dìbà adi, cintu cyàlondà, pàmwàpa ùvwa ùnwé mfwankà, ne ùvwa muswè kunwà mfwankà. Pàmwàpa mmuswè kutwà mubèlà wà mfranga. Pàmwàpa mmuswè kwenza cintu kampànda cyà cibi. Yéyè mmumanyè ne kabìwva bikèngela bwà kwenzaye cyòcì aci to, ki yéyè kwamba ne: “Éyì Nzambi, ùndâbè Mashi à Yesù, ne ùnjidile.”

¹⁰⁸ Ke kujidiibwayè. Ùdi mwà kwela mbìlà, kutùmbisha Mukalenge, kwenza bintu kampànda, kàbìdì, kupàtuka ne kukanza cintu. Vùlukààyi, Yesù wàkamba ne bàà mùshindù awu nebììkalèku mu ditùkù adi. “Bààbûngì nebàlwè bàmba ne: ‘Mukalenge, ncyénakù mwambe cipròfetà, muyishè anyì? Ncyénakù mwipàte badémons, mu Dínà Dyèbè anyì?’” Yesù wàkamba ne: ““Ncìvwa nànsha mumanyè to, nwénù beena mudimu bàà bubi.” Nwamònù’s, ki bôbò abu.

¹⁰⁹ Mpindyewu tàngilààyi eci mpindyewu. Tudi tufika ku dipandulula dyà dyà lusuki mu tuplesa miliyo lukàma ne kwangata kàmwè kààtù, ku lusongo menemene lwà Èvànjeeliyò: “Ndítwè kutàmba mwelè wa mvità wa nseke yibidì, dikòsa too ne ku ditàpulula dyà mufùbà, ne Dijinguludi!” Àlèluuyàh! Nzambi, lekèlèlaku dìbwélè. “Dijinguludi dyà meeji à mu mutù” Ki Èvànjeeliyò nyéyè awu, Bukolè bwà Nzambi. Dìyì dyà Nzambi dimwèneshìibwe ki Èvànjeeliyò.

Wêwè ubi wamba ne: “Bible mmwambe. Aci’s—aci’s n’Dîyì dyà Nzambì.”

¹¹⁰ Èè, Dîyì dimwènèshìibwe ng’Èvànjeelìyò. Èvànjeelìyò mmulwè kutùdi kí nku Dîyì nkààyadi to, kàdi ku bukolè ne dileeja dyà patòoke dyà Nyumà Mwîmpè, bwà kuleeja patòoke Bukolè, kuvwija Èvànjeelìyò ne mwoyi.

¹¹¹ Pângààkayà ku Inde, mwèpiskòpò wa mutàmbidile wa—wa èkèleeyiyà wa ba-Méthodistes kupàtukaye, wàmba ne: “Mukalenge Branham, katwèna baswè kumanya ní ncinyì ní ncinyì cidi citàngila mpàndànjilà kampànda nànscha. Twétù tudi bamanyè byàbûngì pa bìdì bítàngila Bible kutàmba munùdì nwènù mwà kumanya.” Yéyè ne: “Twétù tuvwa èkèleeyiyà, ne basòmbe mwaba ewu bidimu binunu bìbìdì kumpàla kwà nwènù kwikala ditunga.” Neyà bushùwà. Kàdi kwambayè ne: “Tudi bûmvwe ne Nzambì mmurwendèlè ne mutwàle dipà dìdì mwà kwenza ne Bible ewu ikalè ne mwoyi.” Yéyè ne: “Ki cidi cikoka ntèmà yètù aci’s.” Kaa, ekèlekèle! Nwamònù’s, muntu awu ùvwa mwâna, kàyi mwikùlù to, bu mwàkambà Davìdì. Nwamònù anyì? “Tudi baswè kumanya. Neilelèlè anyì?”

¹¹² Mêmè ne: “Cyà bushùwà, ncyà bushùwà. ‘Yesù Kilistò umweumwe awu makèèlèlè, leelù, too ne kashidi.’”

¹¹³ Mpindiyewu, mumònàayi, èkèleeyiyà wà mubidi ùdi ùkèngesha èkèleeyiyà wa nyumà. Mpindiyewu, tudi tujandula dîbà adi ne Yudààsà ùdi munkaci mwà kudyàmba mùdiye mwanèètù, mwanèètù kampànda, ne pashiishe kubàndaye ne kutungunukayè ndekeelu wa byônsò too ne mu katòngòbèlè.

¹¹⁴ Mpindiyewu tàngilààyi muysihi wa citende ewu. Yéyè ùdi ùlwa mu mwaba kampànda, wàmba ne: “Mukalenge, ndi ntàngila bakàjì. Kabivwa bikèngela bwà mêmè kwenza nànkú to. Ndi, nudi bamanyè’s, mwenzè bintu byà pa buloba. Kabivwa bikèngela bwà mêmè kwenza nànkú to. Mvwa munkaci mwà kutùùla mfrangà yànyì ku mbilu yà pa tûbalù. Ncì—ncìvwa ne cyà kwenza nànkú nànscha. Mvwa—mvwa ngenza kuya mu sèndèma yà butùkù. Ncìvwa ne cyà kwenza nànkú to. Ndi nsànkila bimfwànyì byà busenji ne bintu byà mûshindù awu, ndi mubilamike mu cibambalu cyànyì. Ncìvwa ne cyà kwenza nànkú nànscha. Ki bintu byà pa buloba mbyôbì abi. Njidilèku, Mukalenge!”

¹¹⁵ Ki Mukalenge kwamba ne: “Èyo, Mêmè nêngènzè nànkú.” Yéyè ùdi ùmulaaba Mashi à Yesù Kilistò ne ùmuqidila.

¹¹⁶ Pashiishe, pàdiye wènza cyôcì aci, dilòòlò kampànda ùpicila mwaba awu e kuumvwaye cintu kampànda. Ki kuyayè kateèleja. Yéyè kuumvwa bwà dibatiiza dyà Nyumà Mwîmpè, dyujibwa dyà Nyumà. Pashiishe ùdi ùtàngilamù ne: “Kaa, ekèlekèle, abi’s mbilenga menemene’s wè! Kàdi, amba tûng, aci ncifwànyine kunyangakaja mudimu wànyì wà bwambi bu mêmè mwà kuciyiisha. Aci’s cidi mwà kufikisha mukàjànyì ku dinyemayè

kumbèlù. Mbafwànyìne kungiipata mu èkèleезiyà wanyì bu mêmè mukabwele mu cyôci aci. Kaa, bivwa bitàmbidile bwîmpè mêmè kushìyangana naaci. Kàdi ndekèlaayi ngooshèmu dîsù. Èyowà, aci's m'Bulelèlè, m'Bible."

¹¹⁷ Èè, bu mwambi kampànda mwendè luumù, mumanyìke buloba bujimà, bàvwa bamusangàne matùkù mashààle aa (küdi muntu kampànda uvwa naanyì mu Puerto Rico mwàmwa) ku binu byèndè, wàkula mu myakulu, mu Londres, mu Angleterre; muntu wa bukolè, umwe wa ku batangadiki bàà batàmbe bunène bàà pa buloba leelù ewu. Nènku muntu ewu, bu mùdì mwànààbò naanyì mwab'ewu, muntu mûlè tèntè ne Nyumà, kuyayè küdiyè e kwamba ne: "Kaa, mwànèètù, ki cyôci aci's!"

¹¹⁸ Yéyè ne: "Ndi mumanyè nànku. Ndi mumanyè nànku. Kàdi, tàngilà, lekèlè nkwmâmbilèku cintu kampànda."

¹¹⁹ Yéyè kwamba ne: "Cìyiishààku mpindyewu. Cìyiishààku. Ki díbà ndyôdi edi. Ne bwenzeji bwèbè abu, udi mwà kunyùkusha bàà pa buloba."

¹²⁰ Yéyè kwamba ne: "To, ncyénà mwà kuciyiisha to. Nwamònù's, è-èkèleeziyà ùdi mwà kungiipata. Ncyénà mwà kuyiisha aci to. Ncyénà mwà kucyènza to." Kaa, mwànèètù!

¹²¹ "Mumanè kupe... mumanè kwikala mujidiìbwè ne mufikè too ne kudipeta dimanya dyà Bulelèlè, mutàngileMù, mumònè ne Ncyà bushùwà; kàdi kubèngà, pa kumònà ne bàdi bàpoopela bôbò biinè Mwânà wa Nzambì ku nkùrusè, ne kuMwadija pa bundu bwà patòòke, bùmvwa bundù bwà Èvànjeeliyò."

¹²² Pôlò wàkamba ne: "Mêmè ncyénà ngùmvwa bundù bwà Èvànjeeliyò wa Yesù Kilistò to, bwalu Yéyè ki Bukolè bwà Nzambì bwà lupàndu." M'Bukolè bwà Nzambì bùkwàcila mudimu munkaci mwà Èkèleeziyà Wendè.

¹²³ Kàdi wàkamba ne: "Ncyénakù mwà kucyènza to." Muntu ewu's ne: "Bàvwa mwà kwela meeji ne mêmè mvwa mwena mpenta. Bàvwa bafwànyìne kungenza..." Kwambayè ne: "Luumù lwànyì-lwànyì lùvwa mwà kunyanguka." Kaa, mwànèètù!

¹²⁴ Ncyénà ne luumù to. Ndi ngèèla meeji bwà luumù Lwèndè. Luumù Lwèndè, ki Yéyè awu.

¹²⁵ Kàdi tàngilàayi mùdìbo batwàngàne naaCì nkundù, nudi bamanyè's: "Kàdi kuvwija Mashi à cipungidi àvvwàye mujidiìbwékù awu, cintu cyàkamujidilà ne kumupâtula mu maalu à pa buloba, ne kuteeta kumutèèka kumutù mu Mwaba ewu. Ne pashiishe ùdi wôshaPù dîsù, ne mwikale ne dimanya dyàWù. Bwà kuÈla nyimà, kî nkushààle kàbìdì mulàmbù wà mpèkaatù to," mùdì Bible mwâmbè, "kàdi dindila dyà cilumbulwidi dìdì dìkwàcisha bôwà ne kapyà kàà cinyongopelu kàvwà ne cyà kwikalakù, kìikalàku, kìikalà ne cyà kubütula mulwishi. 'Bwalu busombwedi mbwànyì,' mmùdì Mukalenge

wàmba. Ewu uvwa udyombola mukenji wà Môsà, ùvwà ùfwa kakuyì luse to, ku bujaadiki bwà bamónyi bàbìdì anyì bàsàtù. Nebítambè kwikala dinyoka dyà munyì, ne dinyoka ditambe kukola bishi, dìíkale dikùmbànyìne, mwambi udi mudyatàkàje Mashi à Yesù Kilistò mwinshi mwà makàsà èndè, paanyimà pàà mananè kupeta dimanya dyà Bulelèlè, ne kuDivwija bu cíntu cídì kaciyi cyà cijila to.” Yoyoyo!

¹²⁶ Nwamònú mwaba utùdì neenù anyì? Yesù wàkamba ne: “Nwadímukaayi.” Nwamònú mùvwà Yudààsà anyì? Yéyè ùvwa ànu naabò. Yéyè ùvwa Esawù awu, muvwijìlbwe mutàmba bunène mu cikondo eci. Ùvwa museeswishanganyi, mutentudyanganyi, muvwijìlbwe mutàmba bunène mu cikondo eci. Ki yéyè udi ubànde ewu, cyàkàbìdì, too ne ku diikala mwanaàbò ne Yesù, ùvwa udyàmba mùvwàye mwanaàbò awu. Kàdi mu mwoyi wèndè, yéyè ùvwa ne èkèleeyìà wa kale wa musunya díbà dyónsò, bwalu ki mwaba wàkasùmbishaye Yesù awu. Wàkasùmbisha Yesù, bukenji bwèndè bwà bwanàbutè, ànu mwàkenzà Esawù menemene bwà dìlòngò dyà musàbù. Wàkasùmbisha bukenji bwèndè bwà bwanàbutè bwà bìnjànjà byà mfranga makumi ásàtù.

¹²⁷ Balùme ne bakàjì báàbûngì leelù ewu mbasùmbishe bwàbò bukenji bwà bwanàbutè bwà dimanyika kampànda, cíntu kampànda cikèsè cyà pa buloba cyúdi kacya kùyì mwânjì kucímuna to; bakàjì kampànda, batekète, bàdilaaba bilaabu, ne babebulba nsukì, bálwàta tulàmbà twípì; balùme, bwà minèkù mikesè yà manyaanù bënda báñwa mfwankà, bintu kampànda byà pa buloba. “Wêwè munangè buloba anyì bintu byà pa buloba, dinanga dyà Nzambì kadyèna munda mwèbè to,” mwàmbambà Bible.

¹²⁸ Ncyénà muswè kunùtápà ku mwoyi to, kàdi tudi batàngile ku ndekeelu. Tudi munkacì mwà kubànda mpindyewu, tudi munkacì mwà kubànda ku cibàndilu lùkàsàlùkàsà mpindyewu.

¹²⁹ Nwamònú mùdìbi anyì? Bàdi bacyènza. Mbadyànjiла kulongolola. Bàvwa bafwànyìne kutentula ne kwikala ànu ne kalolo ne badipwekèshe, ànu pabwípì menemene, bu mùdì beena Kilistò, batwàngànè nkundù bafwànyìne kuseeswisha ne basungula mene; kàdi ku mamuma àbò nkunwàbàmanyina.

¹³⁰ Mukàjì kampànda udi muvwàle kapùtulù, kàtukù ùmwèka bu mwena Kilistò, kündi nànscha. Bible mmwàmbe ne: “Ncintu cyà mpèkaatù ne cíntu cyà bundù bwà mukàjì kukòsa nsukì yéndè.” Mukàjì umwèpelè mu Bible wàkadilaaba bilaau mumpàla mwèndè, ùvwa Izàbelà.

¹³¹ Kàdi twambè bishi bwà balùme, nwénù balùme bàdi ne cyà kwikala beena Kilistò, kàdi nulekela bakàjì bëènù bènza ciinè aci? Pààbì, Nzambì neànwimikìle bujitu bwà cyôcì aci! Kí muntu to! Wa musunya! “Kaa, mêmé’s némpatukè díbà adi ne nkashààle mwena èkèleeyìà ewu.” [Katùpà kàà mukàbà wà mèyì munda

mutupù—Muf.] “... nwênu elààyi meeji pa bwalu abu.” Aci’s ke cìvwà Mifundu myâmbè ne bàvwa ne cyà kwenza ncyôcì aci, ne ke cyôcì aci menemene cìdìbo bênzè. Ne ke cyôcì cyènzhàbo, kudyà cibàngà!

¹³² Muntu kampànda kwambàye ne: “Billy, wêwè kùyì mwimànyìke aci to, neüyiishè bantu bônsò lùbilu.”

¹³³ Kùdi Cintu cimwèpelè cìikalà kaciyi mwà kuya to, Nyumà Mwîmpè, bwalu N'Diyì Dyèndè. Ne mwena kwitabuuja mulelèlà mudyànjila kulongolola kàkunyeema lùbilu kuya to, bwalu Cidi Cyàkudyà bwà musùükà wendè. Yéyè mmuCinange. Kakwèna cintu nànscha cimwè cidi mwà kumupangishaCì to. Neenzé ní ncinyi ní ncinyi cyônsò eci, ànu bu Yakòbò, kàdi yéyè mmuswè bukenji bwà bwanàbutè abu. Yéyè neàmanè mwaba awu. Nànscha byôbì bimupangishe balunda bônsò bâdiye naabò, nànscha bimujimijile mudimu wèndè, nànscha bimupangishè bumambàlà bwèndè bwà èkèleziyà, nànscha bumupangishè bintu byônsò. Yéyè neàshàale ànu kacya wàbùkwàtà, bwalu kêna mwà kubùlekela to. Kùdi cintu kampànda munda mwèndè, cìkwàta mudimu, ndondò ùbiikila Ndondò. Kaa, s'ki bwalu mbwôbù abu's, cintu kampànda munda mwèndè!

¹³⁴ Tàngilààyi, cintu kanà cyônsò cinùdì baswè kupeta mu Bible, ne kucyàmbula mwab’ewu, alùkilaayi mu Genèsè bwà kumònà mwaba ûvvaci citooyìkile, kumònà mwaba ùdici cìkafika. Nyumà yônsò ne nkawaka leelù ewu bìdi byàlukila mu Genèsè. Ki citùdì bênzè aci, bwà kunùshìndikila bintu ebi binùdì munkaci mwà kumònà, balunda bànyì. Kanùpu aci mwoyi to. Kanùcilekèdiku cìnùpìcila pa mitù yènù to. Cilekèlaayi cìtùkinè munda mwènù. Abi’s ke bintu byà Nzambi. Cidi cìfika mu katòngòbèlè; ne Yesù wàkadyànjila kwamba ne cìvwa mwà kulwa ku katòngòbèlè cyàkàbìdì mu matukù à ndekeelu, ne cìvwa ne kwenzekela ku eci: Citampì cyà Nzambi, ne cimanyinu cyà nyama wa lwonji; makolè àbìdì à nyumà adi àkwàta mudimu pàmwè.

¹³⁵ Mpindyewu, muntu kanà yônsò ewu mmumanyè ne Cìtampì cyà Nzambi ki bukenji bwà bwànàbutè, dibàtiiza dyà Nyumà Mwîmpè. Efèso 4.30, ùdi wàmba ne: “Kanùbungamiji Nyumà Mwîmpè wa Nzambi, unùdì batwìbwé nendè citampì too ne ku ditukù dyà bupikudi bwènù nànscha.” Pàvwàbo baledìbwé cyàkàbìdì, bàvwa bûle tèntè ne Nyumà Mwîmpè. Nyumà Mwîmpè n'Dilediibwa dipiyadìpyà, tudi bamanyè nànkú. Wêwè udi—wêwè udi mwimita ku Nyumà, mêmè nêngìtabè aci. Kàdi too ne paùdì ulediibwa!

¹³⁶ Pàdì mwânà wìmìciibwa mu difù dyà mamwèndè, ùdi ne mwoyi wà mûngà mùshindù. Aci’s mmwoyi, ne twèndè tukesè... tubùlù tukesè twà mashi tûdì mu mubidi wèndè tûdì tûdinyaonda ne tututakana ne tutupika mùshindù awu. Kàdi pàdiye ùlediibwa, ùdi ne... [Mwanèètù Branham ùdi útuutakaja

byanza byèndè—Muf.] mùshindù awu, ne pashìishe ùpàtuka wèla lubilà, ùlwa musùùkà ùdì ne mwoyi.

¹³⁷ Ne mwânanà wa mu dibòko ùdi mwà kuya mu èkèleeziyà ne kwamba ne: “Kaa, ndi ngìtabuuja mu èkèleeziyà. Mêmè—mêmè nênye, nêngènzè *cikampànda*. Ne ndi mwîmpè... Ndi muswè kwenza maalu mîmpè, ndi muswè kwenza maalu majaalamè.” Kàdi ciidiye ùkèngela ndipì dyà Èvànjeeliyò bwà kumùtâbuluja, bwà kwelaye lubilà bwà Mwoyi wà Cyendèlèlè; ne Nyumà Mwîmpè ùdi ùkòbola, mutùYe kacya kàyi mwânji kukòbola dyàmbedi nànsha. Dîbà adi ùdi cifùkìibwa cipyacipyà, mmulela kùdì Nyumà. Pashìishe übanga kukola, ùkwàta mudimu, ne mwikàle ne bumùntù bwèndè mu Nzambì; nwamònú’s, ànu bu mûdì mwânanà wa mu dibòkò amu, mwânanà wa mu mubidi emu, ùdi ne bumùntù bwèndè pa buloba apa.

¹³⁸ Dîbà adi ntentà wa pa buloba ewu yéyè munyanguke, tudi ne mukwàbò mwindile, nwamònú’s. Ànu menemene mùvvwà mubidi wà mu bufùki awu mupâtuke, kùvwa mubidi wà nyumà bwà kuwàkidila pààkapàtukawu munda mwà mamwâwù apu. Ne pàdiwu ùpàtuka munda mwà mamwâwù, buloba, ciidiwù aci, ùdi ùsanganyiibwa mu difù mwàbù mpindyewu, ùtwa mikèmu, ùdila, (Èyì Nzambì!), ùtwa mikèmu, ùkwàta mudimu mukolè, wènda ùkùlakaja, ne màsaamà, ne bintu byônsò bìikàle bìwùtacisha, kàdi nyumà udi munda mwàwù awu ùdi ujinga buloba bùdì dyàmwàmwa dyà musùlù. Ùdi munkaci mwà kutwà mikèmu, ùdinyonda, (èyowà’s, mukalenge) bwalu kùdì mwoyi munda amu udi ùshàala kashidi. Ùdi mu mubidi ùdì ne cyà kufwà. Nènku mîngà misangu, ànu mùvvwà maamù mulelè mwânanà wa mu mubidi awu, ne mubidi wà nyumà kuwàngata amu; buloba nebùmatè, ne mubidi wà mu bufùki newùmatè, ne mubidi wà misunya... anyì mubidi wà mu dyulu newùwakìdile dyàmwàmwa dyàdyà. Ntentà wa pa buloba ewu yéyè munyanguke, tudi ne mukwàbò mwindile. Ki bwà cinyì udi upwà mwoyi bintu byà pa buloba. Mbifwè, bwèbè wêwè. Ki Nyumà awu’s.

Mpindyewu tàngilààyi nùmonè patùdì tutùngunuka mpindyewu apa, nyumà yìbìdì eyi.

¹³⁹ Nyumà Mwîmpè ki Dilediibwa dipyadìpyà, tudi bamanyè aci. Nkwikala mulèdiibwe cyàkàbidì, kùdì Nyumà wa Nzambì. Mùshindù awu ke wûdì mulèdiibwe, ku Nyumà. Mulèdiibwe kùdì Nyumà, ki Dilediibwa dipyadìpyà ndyôdì adi. Èyo. Udi mwimita kùdì Nyumà; dîbà adi paùdì ulèdiibwa kùdì Nyumà, udi mûjìibwe tèntè ne Nyumà Mwîmpè. Èyo.

¹⁴⁰ Pàdì yìbìdì eyi mu buloba, wa mubidi ne wa nyumà, mîngà misangu wa... Nkààdi mumònè eci. Mpindyewu bwà kwoya, ndi muswè kufika ku dyoya mpindewu, mu kwamba eci bwà tusunsa tukèsè. Mu mubidi anyì mu nyumà, ni ngewu... Mpindyewu ndi

ntèkemena ne muntu yônsò ùdi ùkwàta cyôci eci. Mpindyewu tùükijaayi ne mwènù mwônsò ne kaneemu kààbûngì.

¹⁴¹ Mpindyewu, nukààdikù kacya bamònè eci anyì? Nudi numònà mu èkèleeyìà yètù leelù ewu, nànsha mene mu bisùmbu mutùdi batàpùlùke ne bénze malongolodi amu; nènku tudi bamònè byônsò ebi. Nènku nuvwa numònà muntu kampànda wàngata Mufündu kampànda, nènku, mwànèètù, muntu awu ùdi mwà kwangata Mufündu awu ne kuwùvwija ne mwoyi cyàkàbìdì, kuwùvwija ànu ne mwoyi menemene mùvvàwu mulayìlbwe mu Bible. Ne muntu wàlonda neàmumònè ùcyènza, nènku neàsemene pabwípì ne neàteetè kucyènza, kàdi kupangilayè. Ndi ntèkemena ne nudi munkaci mwà kubala mpindyewu. Yéyè neàpangilè. Bwà cinyì? Mufündu kí mmusonsòdìlbwe kùdiye to. Yéyè ùdi ùteeta ànu bwà kutentula cyanàànà. Ùdi ùteeta kwenza maalu bu cintu kampànda. Kàvwa... Èè, pàmwàpa ùvwa mutumìlbwe kùdi muntu. Pàmwàpa muntu kampànda kwambayè ne: “Èè, udi mwà kwenza cintu cìmwècìmwè aci.” Nwamònù’s, ànu mùvvà Yesù mwâmbe ne necìikale mùshindù ewu. Bible ùdi ùdyànjila kucyàmba mu matùkù à ndekeelu ne: “Ànu mùvvà Yanè ne Yambèlè bakàndàmèène Môsà amu.”

¹⁴² Ki Môsà awu mwimàne, ne ki Yambèlè awu mwimàne. Ke Môsà kwela dikombo dyèndè pansi, e kwandamukadì nyoka. “Mònà’s,” mwàkambà Pâlò, “lwâku apa, Yambèlè, udi mwà kwenza cintu cìmwècìmwè aci.” Ki kwenzayè nànku, nwamònù’s. Kàdi cyàkenzekà ncinyì? Pashiishe ke dikombo dyà Môsà kuminadì dyèndè. Nwamònù’s, byàkamwèneshiibwa patòoke. Dikombo dyèndè dìvwa penyi?

¹⁴³ Byenze ànu bu mmwènenu mutàmbe cyumvwilu. Mbyênze ànu bu mùdi àmwè à ku maalu à mikìshì aa. Mbyênzè ànu bu yìmwè uyà ku maèkèleeyìà mùdìbo bìtabuuja ngitàbìjilù wà mubidi, bìkaadi bipicile matùkù. Bintu byà... Bàdi bàmba ne: “Mònà’s, aci cìvwa mbwà ditùkù dikwàbò.” Mmipàtuke yônsò pàmwè. Kàdi tàngilààyi nyumà ewu mu matùkù à ndekeelu emu mùdiye wènda ùya bwà kutentula Nyumà mulelèlè. Nwamònù anyì? Ki mwabà ùdi lutatù lwènù lùfùmìna ngwôwò awu. Menemene ànu bu wa mulelèlè awu, nwamònù’s; kàdi kàvwa mwà kucileeja patòoke to, kàvwa mwà kwenza ne cìkwatè to, kàvwa mwà kwenza ne cìshaale matùkù àbûngì to. Éyi Nzambi!

¹⁴⁴ Bantu bàdi bàlwà bàmba ne: “Ndi ne Nyumà Mwímpè, mêmè pàànyì.” Tàngilààyi mùshindù ùdibo bënda; kacyèna cìnènga kuumukila ku ditàbuluja ne ku dikwàbò, anyi ku disangisha ne ku dikwàbò to. Cyàkadimwènesha, kabàvwa n’Endè to. Mulùme yéyè mulèdìlbwe kùdi Nyumà wa Nzambi, anyì mukàjì, bàdi ne mamuma à Nyumà. Bàdi bënda mu difwànà dyà Nzambi. Bàdi bàsòmba nsòmbelu awu. Nwamònù anyì? Bàdi bàditòla ntàntà mule ne bintu byà pa buloba. Nzambi ùdi ùkwàta mudimu munda mwàbò ne ùDimwèneshilamù, ne ùshìndika ne

Yéyè n’Nzambì ùdi ùkwàcilamù mudimu. Cikwàbò nditentula. Nwamònú anyi?

¹⁴⁵ Ditentula, ki dyônsò dìvwàku kwônsò eku, munkaci mwà kutentula. Tàngilààyi Ishàmèlà, ne Izàkà; ne byônsò abi, nwamònú’s, ûtentula. Tàngilààyi mupròfetà Môsâ, ne tàngilààyi mupròfetà Baalàmà. Nwamònú anyi? Nudi numòná mwàkapwekàbo’s! Tàngilààyi Yudààsà, ne tàngilààyi Yesù.

¹⁴⁶ Ne Yesù ùdi ùdyànjila kwamba ne Nyumà Mwîmpè ewu, mu matùkù à ndekeelu, ûvwa mwà kwikala Citampì cyà Nzambì. Mpindyewu, ncinyi cìvwà cifwànyine kwikala cimanyinu cyà nyama wa lwonji? Cìvwa cifwànyine kwikala dibèngà dyà Citampì cyà Nzambì. Bwalu, bônsò bàvvà kabàyì ne Citampì cyà Nzambì aci bàvvwa ne cimanyinu cyà nyama wa lwonji to. Nènku piìkalàbi mbimanyinu bìbìdì byà nyumà, cimwè cyà kudìbi neciìkkale cimanyinu cilelèlà cyà Nzambì, cikwàbò neciìkkakè ditombokela dyà Nzambì. Nudikù mwà kucimòná anyi?

¹⁴⁷ Tàngilààyi cimanyinu mu Dipungila Dikùlukulu. Pàvvà mpungi ùdila, bwà cyanga, bidimu byàbûngì byônsò abi, ba—bapika bàvvwa bàpàtuka badiikàdile bwalu mpungi ûvwa mudile. Èè, muntu yônsò uvwa muswè kwikala mudishikàmìne awu, ûvwa mwà kuya. Kàdi bàmwè bàà kùdibò, bàvvwa banangè kwikala bapika, ki kuyabò naabò ku cyoshelu ne mu dikunji dyà èkèleeziyà, ne bàbàtùbula dici ne mulonda. Ne bàvvwa batwìbwé cimanyinu bwà kashidi, bàvvwa bàkwàcila mfùmù awu mudimu bwà kashidi.

¹⁴⁸ Nènku leelù ewu nenùtèèleje mukenji wà Èvànjeelìyò pa Bulelèlà ne: “Mpindyewu wêwè udi mwà kwikala mudishikàmìne pawikala muswè,” Nzambì ngudi wakula neebè awu. Nènku dìbà dyûdì ufika ku mikàlu eku ne ùtàngila dyàmwàmwa, ne mwikàle ne dimanya dyà Bulelèlà, kàdi pashìishe kucyùnguluka, ùdi ùkutùbùla dici ne newikale mwena kwitabuuja wa dimanya dyà mu mutù misangu yônsò. Newikale mutèndeleedi ne uya mu èkèleeziyà, kàdi kùyì upetaku Nyumà Mwîmpè nànscha. Nwamònú’s, dìbà adi udi usadila muntu awu matùkù èbè ônsò à mwoyi. Mpindyewu, cimanyinu cyà nyama wa lwonji, anyì Citampì cyà Nzambi. Nènku tudi twenda tuseemena pabwípi menemene.

¹⁴⁹ Mpindyewu, tàngilààyi, Dîyi dìdi ne cyà kwikala disonsòdììbwé: ùDítèèleja, ùDìjingulula, ne wenza cìdìDi dyàmba. Bantu bààbûngì nebàtèèlejè, kàdi kabààkuDìjingulula to.

Nzambì neâmbè ne: “Ke dibà dyèbè edi.”

¹⁵⁰ “Ncyêna mufwànyine kwikala munsantu mubÙnguluki wa mu malaba to. Ncyêna—ncyêna muswè nànscha cimwè cyà ku Cyôcì aci to.” Nwamònú’s, bôbò kabèèna bàDìjingulula to.

¹⁵¹ Netùye mu masangisha, Nyumà Mwîmpè munene awu neàpwekè. Mvwa musòmbe mwaba awu ditùkù adi,

pààkabwayikà cìkèènà-kumònà ne cidyànjila kwamba ànu bwalu menemene. Mêmè kwamba ne: "Ki nsongààlùmè ulwàlwà ewu." "Lwâkù apa," mvwa mufunkùne lwà ku luseke lùvwa mwakididi wa bantu awu ne: "udi ne dìsaamà dyà mwoyi ne udi ukèba . . ."

"Èyowà. Ncyà bushùwà menemene."

¹⁵² "Nudi numònà mukàjà ùlwàlwà mwaba awu anyì?" "Lwâku apa. Udi ne cyûjà cyà kànsérè ku dibèèlè, ne cìdi ku dibèèlè dyà dyàbakàjà, ne wêwê mwinè udi mu ngiikàdilù mubì be. Ne udi ngènzàmpèkààtù kàdi kùyì . . ."

"Cyà bushùwà menemene."

¹⁵³ Bantu bàdì basòmbe mwaba awu abu, kukènzakanabo, bayiishi ne bônsò abu, kwambabò ne: "uh-huh!" Kuya mu disangisha, kutàngila Nyumà Mwîmpè ùpàtuka mu disangisha ne wàmба maalu masokòme à mu myoyi, bintu byà mùshindù awu. Wàmба ne: "Bilenga be. Ngèèla meeji. Èyowà." Nwamònù anyì? Kaa, mwanèetù! Nwamònù anyì? Cìdi—cidi—cidi ku luseke lukwàbò, kùdi cintu kampànda cyenzèke. Bakàjà nebâtungunuke ànu kutungunuka, bènza cintu cìmwècìmwè aci. Balùme nebààlukilè buludì, bu mùdì ngulube ku bitocì byèndè, ne mbwa ku bilùshì byèndè, ànu byà mwomùmwè. Kanwènaayiku numònà anyì? Mpindyewu ndi ngààkula ne ka—. . . kùdì . . .

¹⁵⁴ Nwamònù's, udi ne cyà kumanya dìbà adi, mulundà wanyì, ne ngiikàdilù kaayi údì usanganyiibwamù awu. Ki bwà cinyì mukàbà wà mèyi ewu, mvwa mwambe ne: "Ùdi ànu bwà èkèleeyiyà nkààyendè." Nwamònù anyì? "Bwà èkèleeyiyà nkààyendè." Pawìkalà mubiìkìdìlbwè bwà kuumuka ku bukénkè . . . kuumuka ku mìdimà kuya ku Bukénkè, kuumuka ku lufù kuya ku Mwoyi; kuumuka ku mmwènenu wa kwísùkwísù, ne wa meeji à mu mutù wa Kilistò, kuya ku dilabula dyà dilediibwa dyà cyàkàbìdì; ne utàngila lwèndu lwèbè, umònà ne lùdi lùtèèka bintu byà pa buloba ku luseke, ne utwà ku cyà Kilistò, kuyì utanga cintu to; dìbà adi cintu kampànda ncyenzèke. Nwamònù anyì? Kùdi cintu kampànda munda mwèbè, ciikàle ne nzala ne cìkwàta mudimu, mùvvaci mu Yakòbò amu. Wamònù's, udi ulwangana mvità ne Mukalenge, udi wenda bishììlàngàne paanyimà pàà aci. Cintu kampànda ncishììlàngàne munda mwèbè, udi mushintùlùke.

¹⁵⁵ Mpindyewu, bìdi ne cyà kwikala nànku, kumpàla kwà byôbì kwenzeka, bìdi ne cyà kusonsodiibwa kûdì. Nànscha bishi, mvwa mwà kwimana mwab'ewu ne kuyiisha too ne mungà . . . ne mwàtùùka nsukì miine yîndì mushààle naayi eyi, too ne mwàkòbamà makaaya ànyì ne mungàpeta bidimu makumi citèèmà, kàbìdì pèèbe utèèlèja ditùkù dyônsò; Nzambi kàyì mukufùùlùwilaci to, newikale ànu mu lwidì lùmwèlùmwè elu.

¹⁵⁶ Matùkù àbìdì majimà ândì munkaci mwà kulonga ne kusambilà pa bwalu ebu. Nwamònu anyì? Mêmè kwamba ne: "Mukalenge, ncyàmbila èkèleezìyà anyì?"

¹⁵⁷ Cintu kampànda kwambaci ne: "Cyambè. Dîbà dìkaadi pabwípi. Cyambè." Ndi ngùmvwa ne Neànguumushe matùkù makesè aa, pa nànku ndi—ndi muswè bwà nwénù kucìmanya.

¹⁵⁸ "Muntu nànsha umwe kêna mwà kulwa kùNdì to," mwàkambà Yesù, "pàdì Taatù Wanyì kàyì mumukòke dyàmbedi to. Kaa, ndi mumanyè ne nudi nwamba ne nudi ne Nzambi ne Abraham, bu tatwènu; kàdi ndi nnwàmbila eci, nudi bà... tatwènu dyabùlù," mmwàkambà Yesù. Batèndeledi, baakwidi, ne bantu banène ne: "Nwénù nudi bàà dyabùlù, tatwènu." Nwamònu anyì? Mònaayi, mamuma à Nyumà.

¹⁵⁹ Mpindyewu, nwamònu's, bìkèngela cìfuululudiibwe kûdì.

¹⁶⁰ Ncìvwa mwà kudifwànyìkijila Noà wàmba ne: "Nudi bamanyè mùdì bwalu anyì? Bidi ànu ne cyà kwikala ne mvùla mmufwànyìne kulòka dìngà ditùkù, pa nànku ndi ànu mwà kupàtuka ne kudìbakila bwâtù. Mvùla yéyè mulòke, èè, nembwelè mu bwâtù ne kukwàta njila kuya. Ne kakwàkwikala cintu cyàntàcishà to, bwalu nembwelè mu bwâtù ne kwasa lwendo kuya." Nudikù mwà kudifwànyikijila anyì? To. To. Aci kacìvwa cyôcì to. Bu ne cìvwa nànku... Kaa, Basungula bâcítèèlejeku mpindyewu. Bu cyôcì cìfwànyìne kwikala nànku, musekyanganyi wa kumpàla wàkapicila mwaba awu, mùdì Bible mwâmbe ne bàvwakù amu, kàdi kumusekayè, nùnku's ùvwa mwà kwikala mutèèke nsandu wendè pansi mukwàte njila moyè.

¹⁶¹ Mùdì bantu bènza leelù ewu, bàdì bàbangà ne Yesù; kàdi pàdìbo bâtàngila ne bàmòna Bulelèlì, bàdi baBwèlì nyimà bàya. Kabèèna mwà kuBùtwàla to.

¹⁶² Bu mùvwà mutangidiki wa luumù awu mwâmbe ne: "Necì—necisùnsululè mudimu wànyì wà bwambi." Ncyèna dijinga ne mudimu wà bwambi ùdì Nyumà Mwîmpè üsùnsulula awu to. Udi ne cyà kusùnsuludiibwa. Mpindyewu, kàdi mònaayi, ndiditàmbisha, bitàmba kushindameena pa muntu, buntu bupite. Kaa, tàngilààyi mu cyôcì emu mpindyewu.

¹⁶³ Noà ùvwa mupàtuke mu mpàta, ne wàkatèèleja, ne wàkajingulula, è kwenzayè mudimu. Nànsha mwàkalwàbo kûdì basekyanganyi bààbûngì amu, wàkatungunuka ànu ne kwibaka.

"Noà, wêwè udi munsantu mubùnguluki wa mu malaba."

¹⁶⁴ "Kabyèna bìntàcisha nànsha kakesè to." Mutùngùnuke ne kwibaka! Ùkaavwa muumvwè. Ùvwa mujingùlùle ne n' Nzambi, wàkadilumbulwishila ku Mifùndu, ne cìvwa nànku. Wàkadibwinka dyàkàmwè mu diibaka dyà bwâtù, kàyì ùtanga bwalu to.

¹⁶⁵ Nudikù mwà kudìfwànyikijila, nudikù mwà kudìfwànyikijila eci anyi, cyà ne Môsà, mu njila mutàngile mu Èjiipitù, kupàtùkayè dìnga ditùkù e kwambilayè Sefòlà, mukàjèndè ne: “Sefòlà, udi mumanyè mùdì bwalu anyì? Ndi mupilùje mwakulu wànyì ndambù. Ndi mwolòlòle ndambù wa makumi ànyì wônsò, ne ndambù wa géomètrie wanyì ne, kaa, bintu bikwàbò byàbûngì, ne dilonga dyànyì dyà kàalaasà. Kacya ngâbanga kulama mìkòòkò paanyìmà apa, ndi—ndi—ndi mupilùke mu bimwè byà ku byôbì abi. Mwwa mwenze cilèma mu Èjiipitù. Ndi ngèèla meeji ne nêmpwekèmu nkacilongòlòlè. Ndi ngèèla meeji ne nêmpwekèmu”? To, divwala dyà kumpàla dyàkamulwilà, nunku’s ùvwa mufwànyìne kufwìla mwaba awu.

¹⁶⁶ Cyàkenzaye ncinyì? Wàkapwà mwoyi byônsò bìvvwàye mumanyè pa géométrie abi ne pa dimanya dyèndè dyà mu mutù adi. Dyôdì adi ndyàkamubwejà mu lutàtu.

¹⁶⁷ Ki cidi cibweje èkèleезија mu lutàtu leelù ewu ncyôcì aci, mbayiishi bààbûngì bâdì balonge tûlaasà kabàyì baledìlbwe kùdì Nyumà to. Balùme ne bakàjì mbaswè kutèèleja miyiiki yà meeji à mu mutù, pamutù pàà kuyiisha bukolè ne dibiikà dyà ku lufù dyà Yesù Kilistò. Ki cidi citùbweje mu lutàtù leelù ewu ncyôcì aci. Katwèna tukèngela bikwàbò bilongelu bitùmbùke ne dilonga dyà tûlaasa bwà bayiishi to. Bidi bítùkèngela bantu bàà Nzambì bâdì bûjjibwe tèntè ne Nyumà Mwîmpe, kàdi kabiyì tèolòjì kampàndà wa dìngumba kampàndà mukwatakaja kùdì bantu to. Tudi tukèngela balùme babiikila kùdì Nzambì.

¹⁶⁸ Môsà ùvwa ùdiîsha mìkòòkò, musòmbe mupwè ne mwoyi. Ùvwa mumanyè ne mamanya èndè à mu mutù àvva mapangile. Ùvwa mumanyè ne dilonga dyèndè dyà tûlaasà dyàkamupangisha. Ùvwa munkaci mwà kudiîsha mìkòòkò, kàdi wàkuumvwa, kaa ne: “Kòpolà bìsàbaatà byèbè, Môsà, buloba bûdì mwimànepu mbwà cijila.” Wàkatèèleja cyôcì aci. Cìvwa ncinyì aci? Dìyì dìvvà Mwanjèlo mwâmbè adi dìvvwa dyà mu Mifundu. Ùvwa mulaye Abraham, tatwèndè ne: “Nénkùmbulè cisàmbà paanyìmà pàà bamanè kupweka munwemu bénze bidimu nkàmà yìnaayi, ne Nêmbàpâtùlè ne dibòkò dyà bukolè.” Wàkajingulula ne aci cìvwa m’Mufundu wà Nzambì munkaci mwà kumwèneshiibwa.

¹⁶⁹ Lekèlaayi ngänjì kwimana katùpà. Lekèlaayi eci cìbwelè mu ndònđò. Nudikù bamòne cîndì munkaci mwà kwakula leelù ewu anyi? Dìyì dyà Nzambì dìdì munkaci mwà kumwèneshiibwa ànu kumpàlè kwènù mene, kàdi nwêñù kanùyì nudijingulula to. Anjì elààyibì meeji mpindyewu ku Sodomà ne Gomòlà; anjì elààyibì meeji ku mulayì wa Kilistò bwà matùkù à ndekeeluu aa.

¹⁷⁰ Môsà wàkacijingulula; cìvwa cyà mu Mifundu, cìvwa mmulayi. Wàkuumvwa, wàkajingulula. Cintu kampàndà kubwelaci munda mwèndè, mwanètù, dîbà adi ùvwa mwà kuya kacyenza. Wakenza. Ùvwa mwà kuya kakwàta Pálò yônsò.

Ùvwa mwà kubìkila bipùpù dîbà dìvvwàye muswè. Ùvwa mwà kukàngula Mbû Mukùnze, bwalu ùkaavwa muumvwè, ùvwa mujingùlùle, ùvwa wènza maalu pa kaaba kàà Nzambì.

“Mêmè nengikale Nzambì kûdì, wêwè wìkalè mupròfetà kûNdì,” mwàkambà Ye.

Ki yéyè ne: “Ncyêna mwà kucyènza to.”

¹⁷¹ Yéyè ne: “Èè, dîbà adi, wêwè udi nzambì, ne Aalònà ikalè mupròfetà webè. Udi ne cyà kuya, nànsha bishi.”

¹⁷² Kacya Yéyè kàtukù ànu mwambè ne: “Èè, pàmwàpa bìvwa bìkèngela bwà mêmè kupweka bwà kulongolola bintu abi to.”

¹⁷³ Nudikù mwà kudifwànyìkijila Eliyà pa Mukùnà wa Kaamèlè, wàmба ne: “Nudi bamanyè’s, buloba ebu mbwà mpèkaatù wa wènza bwôwà, pàmwàpa, pàmwàpa mvwa mwà kupàtuka ne kukambilà Aakàbà ne ùvwa ne cyà kudyùmvwa bundù. Pàmwàpa mvwa ne cyà kuya ku mukùnà kwàka ne kusòmbakù, ne kujila byàkudyà mukùngùlù mule, mu mùshindù wà ne bantu abu buumvwè bìbàtonda ne bàcyòka ne dimmònà kuulu aku munkaci mwà kufwà ne nzala”? To. To. Aci kacìvwa nànkú to.

¹⁷⁴ Kàdi wàkuumvwa, ne wàkajingulula, ne wàkenza. “Ndi mutùmìnè bikòlolò dìyì bwà kukudìisha. Bànda kuulu kwàka, Iwà ku Kelità.”

¹⁷⁵ Pààkakùmbanà dîbà dyà ditetangana dyà makàndà pankaci pàà Bâlà ne Nzambì, kwambayè ne: “Ndaayi, kangàtaayi milàmbù yènù, nwenzè naayi cintu kanà cvônsò cinùdì baswè kwenza, kàdi nùsokè kaanzambi kèènùaku.” Pààkaditápàbo mpùtà, ne benze maalu àbûngì à musunya, ne kutùpikabo bâdyèla muulu bâàlukila pansi, bènza mutooyi wàbûngì, kwambayè ne: “Elààyi mbilà mikolè ndambù, pàmwàpa mmuyè, ùdi munkaci mwà kwenza cintu mwaba kampàndà. Mmufwànyìne kwikala mulàlè.” Kaa, mwanèètù!

¹⁷⁶ “Èè, udi mumanye mudi bwalu anyì?” Yéyè ne: “Mêmè ndi mwena kwitabuuja mu Yéhowàh, nànkú ndi mwà kwenza cikampàndà eci, nànsha bishi.” Kaa, to, kùtentudikù aci to. To. Kùteeci kwikala Eliyà pàdì Nzambì kàyi mukubìkile bwà kwikala Eliyà to. Eyowà, mukalenge. “Ndi musadidi wa Yéhowàh.” Bâdikù nkàmà mwandamutekète kuntu kwàka, kàbidi, kàdi nànsha umwe wa kùdibò kààkadidinga bwa kucyènza to.

¹⁷⁷ Pashiìshe pààkasaayàye ngombe wa mpànga ne kupòngòlwelapù mâyì, wàkamba ne: “Mukalenge, ndi mwenzè cintu eci ku dìyì Dyèbè ditùma.” Nwamònù cìdì...Muntu kanà yônsò ewu ùvwa mwà kwikala mutètè, ùvwa mwà kumutuula ànu mutupù mwà menemene emu.

¹⁷⁸ Ànu cyôcì cikusonslwela! Nyumà Mwîmpè ùdi ne cyà kucìtwàla ne kucìmwènesha patòòke kûdì.

¹⁷⁹ Ki lutàtù lùdìku leelù ewu ndwôlò alu. Kwêna mwà kukuuka, ku cyoshelu, kwamba ne: “Èè, Àlèluuyàh, Àlèluuyàh. Mukalenge, ndi muswè Nyumà Mwîmpè. Àlèluuyàh, Àlèluuyàh.” To.

¹⁸⁰ Kàdi, mwanèètù wa balùme, mwanèètù wa bakàjì, pàdi Nyumà Mwîmpè musonsòlè Dìyì adi kûdì, neùMupetè kumpàla kwà wêwè kuumuka mu nkwasa webè amu. Cintu kampànda ncilàkùke munda mwèbè amu. Muyiishi kààkwikala ne cyà kukwambila ne enzà *cikampànda* enzà *cikansanga* to. Mabèjì à kale neàditùùkile, ne mabèjì mapyamàpyà neàtolokèku. Mbakusonsòlwèlaci. Wêwè kwàkufikila muyiishi munda pàdiye ûyiisha Bulelèlè bwà mu Bible to. NeùBunangè, neùBùkèbè. Bùdi Cyàkudyà cyà musùùkà wèbè.

¹⁸¹ Nànsha Yesù, Yéyè mwinè, Wàkamba ne: “Ncyêna ngènza cíNdì muswè kwenza, mu Mémè mwinè to. Mwâñà kénâa mwà kwenza cintu nànsha cìmwè to ànu cìdìYe umònà Taatù wènza aci.” Même... Yéyè ûvwa Èmanùwèlè, Yéyè mwinè. Ûvwa Nzambì pa buloba; ke cìvwà Yesù. Ûvwa mubidi ûvwa Nzambì musòmbèlemù. Yéyè nguvwa ntentà uvwa Nzambì musòmbèlemù. Amen. Kàdi mu byônsò abi, Mwâñà wa Nzambì mulela kûdì virgò, Èmanùwèlè mu kaabujimà kàà Nyumà, Ûvwa ne Nyumà kàyì ne cipiminu to. Kàdi, nànsha nànku, mu mubidi Wènde Yéyè mwinè, Yéyè wàkamba ne: “Ncyêna ngènza cintu nànsha cìmwè to ànu pàdì Taatù Ündeeja dyàmbedi.” Cimusonsolwela kudiYe, bwà kucyènza!

¹⁸² Sàtaanà kwambayè ne: “Andamùnà mabwè aa àlwe mâmpà, ne enzà cishimà. Cyenzaaku tûng.”

¹⁸³ Yéyè kwamba ne: “Bààkafunda ne: ‘Muntu kààkwikala ne mwoyi ku dyâmpà nkààyaadi to.’” Kaa, ekèlekèle! Kàdi pàvvà musùmbà wà bantu ne nzala, Wàkambula mampà àtaanu ne tuumishipa tûbìdì tukesè, e kudisha bantu binunu bïtaanu. Kaa, Àlèluuyàh! Nudi numònà cíndì njinga kwamba aci anyì?

¹⁸⁴ Kûteeci bwà kutentula to. Ki lutàtù lùdì naalù Mpenta leelù ewu alu. Ki lutàtù lùdì naalù èkèleeziyà leelù ewu alu's, kûdì bààbûngì menemene bàdì bateeta kudingidija mùdibo ne Nyumà Mwîmpè. Kûdi bààbûngì bàdì bateeta kutentula dyondopa dyà kûdì Nzambì. Kûdi bààbûngì bàdì bateeta kutentula bintu bishìlèshìllàngànè byà Mukalenge. Kwena mwà kwenza nànku to. Bintu abi bidi bifümina ku disungula, dibìkila dyà Nzambì, udi mupâtùke naabì munda mwà mamwébè. “Mapà ne mabiìkila kî mbyà dinyingaleela to.” Kaa, ekèlekèle! Aci's ncilelèlè. Kwêna mwà kudìvwija cintu kampànda cyûdì kùyì to.

¹⁸⁵ Kàdi Nzambì Yéyè mukubììkile, ikàlà muntu wa kusàkidila kwàbûngì pa buloba bwalu Yéyè mmukubììkile. Dibà adi cìdi cîlwa cilelèlè menemene kûdì.

¹⁸⁶ Mûndì mufwànyìne kwamba, bu ngîkalapù ne dîbà, pa bwalu bwà nshìndì ditùkù dikwàbò, bwà mwà kanshintululàci.

Kacya kwônsò eku ncìvwa mwanji kucìmònaku nànscha, ne ncìvwa mwà kucyènza to. Hattie, udi musòmbe lwà mu ndekeelu mwàmwa muntàngile. Mmunyì mùvwà cyôcì mwà kwenzeka? Kacìvwa mwà kwikala cicyènze to, kàdi cìvwa cisonsòdìibwè, civwijìibwe ne mwoyi. Dîyì dìvwa dyakùdìibwe ne byàkenzeka ànu nànsku. Àlèluuyàh!

¹⁸⁷ Pôlò, nudikù bafwànyìne kudìfwànyikijila yêyè wàmba ne: “Mvwa mwenze matükù dikumi ne ànaayi à munya ne à bufùku pa mbû ewu, byà bwalu abi kakùyì ní mmítòòtò ní ngondo, anyì dîbà nànscha cintu cìmwè. Mvwa ngèèla meeji ne nênye ànu nkàbambile ne: ‘Koleshaayi mwoyi, bwalu Nzambì neàtúcyùke, nànscha byà munyì’”? Kaa, Nzambì kàtu ùkwàta mudimu mùshindù awu to. Nzambi kàtu wènza nànsku to.

¹⁸⁸ Diitabuuja dyèbè dìdi bîmpè, mwanèètù. Diitabuuja dyèbè ndilenga be. Kàdi ànu cintu aci cisonsòdìibwè kûdi!

¹⁸⁹ Kaa, ki bukénkè bukùnze bùdì bulembèlè bwàbwa, kàdi mêmè mumòne... Ndi ngàamba ne: “Èè, ndi ne dikàsà dyànyì pa dikàsà dyà biteshì byà màshinyì. Ndi ne kàshinyì. Ndi mwà kusambuka bukénkè bwàbwa, muvùkùte lubilu lwà kîlòmèètà lukàmà ne makumi citèèmà ne yìbìdì ku dîbà.” Ncyà bushùwà. “Ndi mwà kuumvwa bukolè mwinshì mwà dikàsà dyànyì.” Kàdi mbîmpè kwindila too ne pààlwà cimanyinu cyà ne: “ndàku” aci. Àlèluuyàh!

¹⁹⁰ Nudi bûmvwè cîndì njinga kwamba aci anyì? [Disangisha dìdi dyàmba ne: “Amen.”—Muf.] Pàdì cimanyinu cyà *kuya* cipàtuka, mbîmpè. Pàdì cintu cikusonssolwela, ne Nzambì ùcimanyisha bu mwàkenzà Ye kale wàwa, mbîmpè. Kàdi pàdì Ye kàyì mwanji kucyènza to, tudi ne musùmbà wà ba Yudààsà munkaci mwà kutentula, útunguka ne kwenda mùshindù awu, wàmba ne: “Èè, ndi ànu wa mwomùmwè naabò. Ndi pàànyì, mwena Kilistò.”

¹⁹¹ Kaa, kanwèna bavùlùke anyì? Bânà bàà Scevà, bààkaya e kwambabo ne: “Tudi tukutumina dîyì, tukutumina dîyì mu Dînà dyà Yesù udi Pôlò uyiisha awu. Pàtukà!”

Yêyè kwamba ne: “Pôlò ndi mumumanyè, ne Yesù ndi mumumanyè, kàdi nwènù nudi banganyì?”

¹⁹² Dîbà dìlwalwa dììkalà cilelèlè ne cyà mafi ne cyà kumwènèshiibwa patòòke. Cìdi cimwènèkela mu beena Kilistò leelù ewu. Bìdi bileejikila mu maèkèleeziyà leelù ewu. Bìdi bileejikila mu bantu leelù ewu. Ndi munulamè ntàntà mule; ndi muswè bwà eci kunùfikaci.

¹⁹³ Pôlò kààkambakù ne: “Ngèèla meeji ne nêmbandè ànu cyanàànà ne kubàmbila ne: ‘Èè, ikàalaayi ne dikima dyônsò.’” To.

¹⁹⁴ Cyàkenzaye ncinyì? Kutèèlejaye Mwanjèlò. Ùvwa mumanye ne ùvwa m'Mwanjèlò umweumwe uvwa misangu yônsò ànu wàkula nendè awu. Wákajingula, pasìishe wàkenza bwalu.

Wàkiimana kuulu e kwambayè ne: “Ikàlaayi ne dikima. Bwalu Mwanjèlò wa Mukalenge, Ùndì musadidi wendè, ùvwa mwimàne ku luseke Iwànyì dilòlò dishààle edi, ùndeega cikèènà-kumònà kampànda cyà ne kakwàkwikala cintu nànsha cìmwè cyàjimina, mu bwâtù emu to. Ikàlaayi ne dikima. Kadyàyi cyàkudyà cyènù cyà mu munyà emu mpindyewu. Byônsò bìdi ànu bîmpè.” Amen. Pàdici cikusonsolwela, mpàdì Nzambì ùcìvwija cyà bushùwà!

¹⁹⁵ Ndi ne dìyì kaaba aka mwaba kampànda, mvwa mufunde. Ndyôdì edi mwaba ewu. Uh-huh. Tudi ku ndekeelu kwà bintu byônsò. Swâyì ncìtwàlè ànu mùshindù ewu mpindyewu, bwà kwoya. Ndi ntèkemena ne Nzambì mmukubuwlile cintu kampànda. Tàngilààyi. Byônsò bìdi ku ndekeelu. Muntu kampànda wàkakonka dilòlò adi, ngèèla meeji ne ùvwa m'Mwanèètù Fred Sothmann, tuvwa tudikonka bwà mùshindù ùdì cikondo cyà nshììkidilu cisemène.

¹⁹⁶ Mwanèètù Demos Shakarian ùvwa mumònè cikèènà-kumònà aci cimwènèshìibwe, ne cyàkakùmbana paanyimà pàà matùkù àtaanu, pyòpyopyò, cìvwa cyàmbè kumukùlula. E kumbiìkilayè. Yéyè kwamba ne: “Yòzefù ùdi bìshi?”

Mêmè ne: “Bîmpè.”

Yéyè ne: “Ùtu ùmònà bìkèènà-kumònà anyì?”

¹⁹⁷ Mêmè kwamba ne: “Èyowà. Ùvwa mungambila bwà David, mwânà wa balùme wa Mwanèètù Wood, mùvvwàye mudishìndile pa ntukutuku, matùkù àsàtù anyì ànaayi kumpàla kwà kwenzekaci, ànu pyòpyopyò menemene.”

Yéyè ne: “Udi mumanyè’s, bintu abi bìtu bìlonda mèkù.”

¹⁹⁸ Mêmè kwamba ne: “Bwakàne anyì bubì, èyo, ní ng’eci ní n’cikwàbo. Bìtu bìlonda mèkù.”

¹⁹⁹ Nènku tuvwa tuyikila kakesè ndambù, ne bôbò, Fred kungambilayè ne: “Cyôci eci ncisunyina penyì, Mwanèètù Branham?”

²⁰⁰ Mêmè ne: “Tàngilà, Fred, tûcyàngàcìlè ku bufuki. Nzambì ùtu ùkwàta mudimu mu bufùkì Bwèndè. Tàngilààyi, nùmone cyàkenzekà. Dìbà dyàkapàtuka ku Esètè. Ki dishidimuka dyà kale menemene ditùdì naadì, n’Chine.” Bônsò bwètù tudi bamanyè cyôci aci.

²⁰¹ Dishidimuka dyà kale menemene ditùdì naadì n’Chine. Mmwòmò. Ne dishidimuka nditentèmùke misangu yônsò ditàngìle ku Wesètè. Kàdi mpindyewu nkwpè kûdì mwà kudìsangana bu wêwè mwà kuumuka mutàngìle ku Luseke Iwà Wesetè, uya buludì bwà kusabuka? Uyaàaya ku Chine. Menemene. Tukààdi ku ndekeelu. Bible mmwambè, mupròfetà mmwambè ne: “Nekwikale ditùkù dìkàlè kadìyì bufùkù anyì muunya, pààpicila dìbà pamutù apu, kàdi ku ibaamulòlò,” ànu menemene kumpàla kwà kujikilaku mwab’ewu, “nekwikale Bukénke kàbìdì, bùmwèbùmwè abu.” Yesù wàkamba ne:

“Nekwìkale mvùlà yàmbedi ne mvùlà mishìishe. Ne mvùlà mishìishè neyilelè mvùlà yàmbedi ne mvùlà mishishè, mu muvù ùmwèùmwè awu.” Tudi ku cikondo cyà nshìkidelu.

²⁰² Tàngilààyi kùneeku, lekèlaayi nnùleejè. Cìdììdì cìdi ku ndekeelu. Nudi nwitatuuja nànku anyì? Ndeejaayi cintu kampànda leelù ewu...

DitÙngà edi ki dìdì ditàmbe bubì ku wônsò pa buloba, bwà cinyangu, dipeetù dyà maalu à Nzambì. Nganyì uvwakù mubalè mu Cibéjibeji diloòlò kampànda, mu Louisville, pàvwà bakàjì bônsò aba, bàvvà basungüdiìbwe, mu ditÙngà dyónsò, bakàjì balenga batàmbe bakwàbò mu ditÙngà, kàdi kubiìmanyika bwà kwikalabò ba Miss bàà buloba bujimà anyì? Bantu bônsò bààkayaku pa kuumusha Russie. Ki kutùminabò Khrushchev mukenji bàmukonka ne: “Bwà cinyì kwena mutume?” Yéyè ne: “Russie kàtu ùvùla bakàjì bëndè bilàmbà, bwà kwendabò kumpàla kwà balùme to.” DitÙngà dyà bampàngaanù, dipetudi dyà maalu à Nzambì dìtùdyula twétù bàdì bàdibiìkila ne beena Kilistò, wàmba ne: “Russie kàtu ùvùla bakàjì bëndè bilàmbà, bwà kupàtukabo bënda mùshindù awu to. Ne kanwenàku numònà tûpùtlù anyì bintu byà mùshindù awu mu Russie to.” Aci ndipeetula dyà Nzambì. Ne twétù biinè bàdì bàdibiìkila ne “beena Kilistò!”

²⁰³ Kabyèna bìkèmesha to mùdì Bible mwambè ne: “Mèèsà wônsò mmalwè mûle tèntè ne bilùshì. Kàdi nganyì uNgààlongeshà Dilongesha, kàdi ng’ewu udibò batùule ku dibèèle anyi? Kàdi kanungu nekantentamè pa kanungu, ne mulongo pa mulongo. Bwalu ku mishikù yìdì yìkukumina ne myakulu mikwàbò ke kuNgààkwilà ne cisàmbà eci. Nènku’s ke Diikisha edi. Bwalu byónsò ebi, kî mbafwànyine kuumvwa to.” Tudi ne mmwenenu wetù wa mamanya à mu mitù. Kaa, s’bivwa kwikale bilenga be bwà kushààlaku ditùkù dijimà pa Cyôcì eci.

²⁰⁴ Cidììdì, ncibole! Ba-démocrates, ba-Républicains, ne bônsò abo, mbàà ciipanshì. Ncinyì aci? Mmushikì wà matàmbà masomeka. Muntu yônsò udi ukwàtamù mudimu, udi kàyi mulediìbwe cyàkàbìdì to, ngwa dyabùlù. Dyabùlù wàkamba ne: “Bukalenge bônsò pa buloba ebu mbwànyì mêmè,” kàdi Yesù kààkakòkangana nendè nànsha. Buloba mbukòntonona kùdì dyabùlù. Ne muntu yônsò udi wenza mudimu bwà bukalenge awu, yéyè kàyi mwena Kilistò to, yéyè ngwa dyabùlù ne ukwàta mudimu bwà dyabùlù. MatÙngà aa neàshaale ônsò à Yesù Kilistò pààlwà Ye, nekwìkalè Bukalenge bwà bidimu cinunu.

²⁰⁵ Tàngilààyi kunweku leelù, cìdibo bâlonda mpindyewu. Bângeela mbilà bândyula bwà ditùula dyà mfranga kuntu kwaka bwà kwambulwisha beena Kilistò, ne bajinga bwà kunkòsela bidimu makumi àbìdì mu bùlokò, bwalu ndi mutùule mfranga bwà maalu à ntèndeelu. Kàdi wiski ne maalà à byérè ne mfwankà bìdi bìcyìnguluja mfranga mìliyô makumi yà ndola ku

cidimu, bwà kukoo yisha ditùngà. Kàdi pàànyì nteeta kuyiisha bwakàne, mwimàne mu ciibi cyà Yesù Kilistò, kàdi bàntùma mu nzùbu wa bùlokò bwà cyôcì eci. Kàdi kwangata cintu cyà bwena aci cyà bubì, cyà ciipanshi, cyà meeji matwè, cyà lungenyi, kàdi bàlekela cipità mu ndongamu yà ku télèvìziyò yìdì mikoo yìshe buloba, mitùme bakàjì kùdì mbwa ayi. Ùmwè wà ku milawu minène yìtù kacya ditùngà edi dipetè, kadi bádi bàbàlekela bàbyenza. Bádi bántùma mémè mu bùlokò bwalu ndi tuyishe Èvànjeeliyò, ngàngata ndola mikesè mwab'ewu bwà—bwà kuyiisha Èvànjeeliyò, yìdì bantu bàmpèësha bwà kuyiisha naayì Èvànjeeliyò ayi. Ncyèna mubanji to kàdi ncyèna mwà kubenga kuyifucila bitàdi to. Kàdi nànsha nànku mbaswè kungeela mu nzùbu wa bùlokò, kundama bidimu bìbìdì, ne bádi ne cyà kundumbulwisha àbìdì àdì pansi aa. Kaa, aci's ncyà ciipanshì be, ncyà manyaanù be! Nzambì, ikàlèku ne luse's wè.

²⁰⁶ Nêngambèku cintu cìmwèpelè eci, pàmwàpa ke mùshindù ùdì naawù Nzambì kumpàla kwà kutùma Yè bombe bwà mushindà. Udi ne cyà kwenza cintu kampànda cyà cibì, udi mumanyè's. Udi ne cyà kulenga beela maanyì Bèndè musangu kampànda, bwà Mufündu ùmwèùmwè ewu, kabiyi nànku to... “Kanùlengi Basungula Bâanyì to.” Ncyà bushùwà. Pa nànku piìkalàbi bìkèngela aci bwà kutwàla cilumbulwidi, bu mwàkatwàlaci mu matùkù à Danyèlè anyi mwaba kampànda mukwàbò, cilekèlaayi cilwe. Mêmè ndi musadidi Webè, Mukalenge. Ncyà bushùwà. Kaa, éyowà.

²⁰⁷ Cìdiìdì, ncyà ciipanshì! Ditùngà, dibolè! Èè, ditàngìlaayi! Nebàvvàdikè bàsàlaayi tùpùütulu mpindyewu. Kaa, ekèlekèle! Cìdiìdì, mvità's! Cìdiìdì cìdi ku ndekeelu. Bamfumù bà cimbàmbilà mbabì. Cìdiìdì ncibì. Bwà cinyì kabààkashàala ne mfumù wa difwànà dyà Nzambì bu mùvvà Nzambì mubàpèshyei amu, Davìdì? Mfumù munène wa mu Angleterre wàkamba, pàvvà ewu—pàvvà mungàlààtà ewu mwenjiibwe, wàkamba ne: “Mbîmpè mpindyewu, kàdi nekùlwè cikondo,” mwàkambahaye, “neciìkale cintu cyanàànà. Nebììkalè bashàale ne cipàkù bwanga buyè.” Nènku yéyè mmubingè. Wàmba ne: “Beena cìdiìdì mbiimàne pa tushèète twà nsàbangà mu ditumba dyônsò, bintu byà mìshindù mibì byônsò bìdi binyanga bukalenge.” Nànku muntu awu ûvwa mubingè. Ncyôci menemene cìdi munkaci mwà kutùngunuka.

²⁰⁸ Muntu umwe ùdi mwà kupàtuka pambèlù apa, ne kupìcila apa bwà kukwàcika maala, ne kusùnsulula cintu cyônsò cìdiye mwà kusùnsulula aci; ne kupweka kwinshì kwàka, mmumanyè muntu yônsò, mu mùshindù wà ne kakuyiku muntu kampànda wa ufyotola mukana to. Kàdi lekèla ànu muntu mupèlè kampànda, anyì muntu kasanga udi kààyi mumanyè to, àteetèbi ànu kucyènza, kàdi's bádi bàmwela mu nzùbu wa bùlokò. Diyanguka, ciipanshì, bukooyà, byà pa lukàmà byàbò makumi ànaayi mbalùme bádì bàsèlangana ne balùme naabò.

Elààyibì meeji pa bwalu abu's, Sodoma ne Gomolà cyàkàbìdì! Ke musùmbà ngwàwù's, ùvvà ne cyà kwikalà wà batèndeedi awu.

²⁰⁹ Ndi—ndi ndìkonka cyènzechaka kumpàla eku, pàbwelà mfùmù wâlonda awu mu nkwasà? Nzambì mmutùpèshè muntu mwîmpè wa difwànà dyà Nzambì, mununu Dwight Eisenhower. Kàdi mpindyewu nd nêm... Tàngilààyi cintu cyàlondà pashiishe. Kàdi tudi bafwànyine kupeta nkose musangu ùdì ulonda, ncyà bushùwà menemene. Kàdi kùdi kùlwa: "Pâlò udi kàyì mumanyè Yozefù nànsha." Vùlukààyi cintu aci. Nemfike ku cyôci aci mu katancì kakesé menemene emu. Cìdiidì ncibolè. Tudi bamànyè aci.

²¹⁰ Mvità yìkaadi ku ndekeelu kwàyì. Kaa, bàvwa bààsangana mabwe cikondo kampànda muntu ne mukwèndè, bâtàpangana bisuuyi byenza ne mabwe mu mitù, pashiishe bàsangana miketa ne mafumà. Pashiishe kupetabò bingoma byà pùùpùupù, pashiishe bingoma byà mwambùyì, pashiishe bingoma binène byà cyena Allemagne, ne bingoma binène menemene byètù twétù. Pashiishe kukùpabò tubùlubulu twà mushinda ne mulungù wà gaze. Kàdi patùdi twakula apa bàkaadi ne bombe bwà hydrogenè. Mvità yìkaadi ku ndekeelu. Ditùngà ne ditùngà dìdi naabì, ngambilaayaku tûng cinwènzà mpindyewu? Nànsha ditùngà dikesè leelù ewu, dìdi ànu mwà kutwà munu pa ndèndè, ki cyônsò cìdibo mwà kwenza, ne buloba bwônsò pààbù bùmba bütüdika. Mvità yìdi ku ndekeelu. Huh! Amen. Mvità yìdi ku ndekeelu. Cìdiidì cìdi ku ndekeelu.

²¹¹ Dilonga dyà túlaasà dìdi ku ndekeelu. Dinyanguka dyà bânà dìdi ku ndekeelu. Bânà, kakwèna cyà ditèkemena bwà bânà to, mbamanè kutomboka. Kanwèna mwà kwikalà ne dilonga dyà kàlaasà nànsha dìmwè to. Kanwèna mwà kuya kuntweku mu cilongelu kàdi kupeta, kupeta mwâna ne nkolèshelu mwîmpè to. Ùdi—ùdi mwânà wa mu ifernò misangu yìbìdì kutàmba pàkaadìyè ùpàtuka apu kupità pàvwàye mubwelèmu apu. Mulongeshi àdìdìngè ambe ànu cintu kampànda pa bwalu abu, bâdi bàmushebeya. Nêbénzè Cikùlùkùkù cikesè bàya bàkaasa mulongeshi awu, bàmupàtula pambèlù bàkamowa ku myonjì. Tudi bajìmìje balongeshi binunu bibidì. Kaa, anji indilaayi kakesè, ngèèla meeji ne bàvwa balongeshi binunu makùmi àbìdì, cidimu cyashààdì eci. Ncyèna mbadyula to. Ncyèna muswè kucyènza to, mêmè pàànyì. Mpindyewu bâtu bàbàndisha bimanyishilu dìbà dyônsò ne: "Pèshaayi bânà aba nkolèshèlù wa mu cilongelu." Bâdi bushùwà bàmukèngela, kàdi dyabùlù mmubákwa. Dyabùlù's mmubákwa. Kàdi kabiyena ànu byà pa ciibidilu bya bwena kupàtuka ne kwikalà ne ciluuji cibi ne—ne—ne kujoomona ciibi cyà ku lupangu ne kucilembeleja kuulu kwà mucì mu dilòòlò dyà Halloween, anyi kwenza tuntu tukèsè twà bucimbè mùvvà bânà bakesè ne ciibidilu cyà kwènza amu to, anyì kwangata ditempu dyà cidimè kuditèèka mu

njila, kabiyì mùshindù awu to; kàdi mbàbùlùke. Bàdi bènza bintu byà dipaala; bàkwasa cingoma, bàkushipa, bàkushebeya, bàkulungà, cintu kanà cyônsò eci. Kàdi's ki lukòngò lwàlondà ndwôlò alu.

²¹² Dilela dyà bânà dyàfiki ku ndekeelu, bukàjì, buledi. Mòna's, dicincika dyà lulelu dìdi dyenjiibwa myaba yônsò, ne twânà twà mbwa ntwangàte kaaba kàà bânà.

²¹³ Nsòmbelu mulenga, kakùcyèna kàbìdì maalu à mu nsòmbelu to. Bakàjì, bàlwàta bibì; bàpicila ku télèviziyyô, mishindù kanà yônsò yà ditentula dyà bantu babì bàà mu Hollywood, bintàkanyì byà mishindù yônsò, myòdelè. Byônsò bïkaadi ku ndekeelu!

²¹⁴ Dilonga dyà túlaasà dìdi ku ndekeelu. Cìdììdì ku ndekeelu. Mvità yìdi ku ndekeelu. Dishidimuka dikaadi ku ndekeelu. Bintu byônsò abi bïdi ku ndekeelu. Ekèlekèle, citùdi mwà kwenza ncinyì dìbà adi? Cìdi cilondà ncinyì? Tukààdi ku ndekeelu kwà bintu byônsò.

²¹⁵ Mpindyewu nsòmbelu wa èkèleeziyà ùkaadi ku ndekeelu, èkèleeziyà mujaalàme, èkèleeziyà awu. Mpindyewu, eci cìdi mwà kulamataku ndambù, kàdi èkèleeziyà wa musunya, èkèleeziyà wa Esawù, mmufike ku ndekeelu kwèndè. Cìdiye munkaci mwà kwenza ncinyì? Üyaaya shikùshìkù ne mu Nsangilu wa maèkèleeziyà, wíkala ndekeelu wa byônsò ne cyà kuswìkakanangana ne bwena Loomò, bwà kulwangana ne cyena Kàtòlikè... anyì ne cyena Kàtòlikè bwà kulwangana ne communisme. Paapà Jean nyéwù ùbììkila maèkèleeziyà ônsò bwà kwalukilawù, ne neàlukilè. Nènku nebàdisange bôbò biinè pàmwè, ànu menemene cìdi EMU MMUDÌ MUKALENGE WAMBA.

²¹⁶ Wèwè udi wamba ne: "Indila kakesè, Mwanèètù Branham. Udi munkaci mwà kupàmbuka." Pângììkala munkaci mwà kupàmbuka, Nzambi ngudi mufùnde Bible Wendè mupàmbuke mu njila. Bikèngela wíkalè Miikà, mu bwalu ebu.

²¹⁷ Morris Cerullo wàkangambìla dilòdlò adi, wàmba ne: "Mufwilakanyi ne Kilistò ùdi penyi, Mwanèètù Branham? Mwena Yudà ke mufwilakanyi ne Kilistò."

Mêmè ne: "Morris! Pèèbè, mwena Yudà anyì?"

Yéyè ne: "Bôbò kàdi ke bakinyi banène bàà Nzambi bàdìku."

²¹⁸ Mêmè kwamba ne: "Morris, kwambiku nàñku to! Ngambilânyi tûng mu Mifùndu mwaba ùdi mufwilakanyi ne Kilistò ùpàtukila mu Yèlusàlèmà. Mufwilakanyi ne Kilistò ùdi ùpàtukila mu Loomò, kî mmu Pàlestìnà to."

Yéyè ne: "Èè, tàngilà, ndi... Bôbò mbakinyi bàà Nzambi."

²¹⁹ "Èyowà, Nzambi kààkambahù ne Wàkaafomija mësù àbò bwà twamònà mwà kupeta ditùkù dyà kumònà anyì? Kàdi ditùkù dyètù nedijikè àbìdì aa."

²²⁰ Yéyè ne: “Kaa, Mwanèètù Branham, kacya ncìtukù mwelè meeji ku cyôcì aci to.” Nwamònù’s, ki bwalu mbwôbù abu’s.

²²¹ Nwamònù’s, tukààdi ku ndekeelu. Bantu bàà musunya, èkèleeziyà wa musunya wüdi kôkù aku, ku ndekeelu. Tàngilààyi mmuyaayaye shikùshikù too ne nsangilu wa maèkèleeyiyà. Ba-Frères Unis mbakabwelemu. Beena Mpenta bàdimù. Bakwàbò bônsò mbadyenzè bulongolodi. Tàngilààyi mu cibandabanda mwàmwa, beena Kanàànà abu, kubangila kwonsò eku too ne nyumà yà Esawù ayi, batèndeleedi bàà wòò, ne kudisangabò ne bàà pa buloba; kabàyì cyumvwidi cyà nyumà to, kabàyì ne bukolè bwà kucimuna nànsha, kabàyì basungula bàà Nzambì nànsha, bwà kubiikidiibwa bwà kupàtuka ne kwikala batàpùlùke.

²²² Kaa, bu mêmè mwà kucimanyisha, bu mêmè mwà kucipoopela mu mùshindù kampànda wà cítükina’s! Nyewù kabàyì bacimònà to. Bàdi ne mësù kàdi kabàyì mwà kumònà to, ne macì kàdi kabàyì mwà kuumvwa to. Kaa, bwà cinyì tudi banêmè bujitu mu Nyumà mùshindù ewu? Mpindyewu, tèelejààyi eci. Byônsò bìdi ku ndekeelu.

²²³ Ne Èkèleeziyà wa nyumà ùdi ku ndekeelu Wendè. Wäfikì ku ndekeelu. Éyì Nzambì! Tàngilààyi kale wàwa pààkatwàdijàYe ne Luther, kuupukayè, wa nyumà awu. Pashiìshe ne Wesley, kulwa ku dijidiibwa. Pashiìshe ne Mpenta, Nyumà Mwímpè. Nènku mpindyewu ku cikondo cyà nshiìkidilu, Nyumà wa Kilistò mutàmbe kwikala mu Èkèleeziyà, Ükaadi wènza byenzedi bimwèbimwè byàkenzàYe abi, kwalukila buludì ku Mutù Wèndè kàbìdì; mudìlongòlòle bwà Èkèleeziyà ne Kilistò bwà kudìsanga, ne Dilwa dyà Mukalenge Yesù, ne dibiìkà dyà bafwè ku lufù. Tukààdi ku cikondo cyà nshiìkidilu. Yesù wàkamba nànkú: “Ànu mwàkadibi mu matùkù à Sodomà, ki mwikalàbi kàbidì ku dilwa dyà Mwâñà wa muntu.” Nudi nucyùmvwa anyi?

²²⁴ Tàngilààyi èkèleeziyà wa musunya. Tàngilààyi kùdìbo bàya, kule ne kule menemene.

²²⁵ Tàngilààyi Èkèleeziyà udi mûle tèntè ne Nyumà, udi utàpuluka ne tuntu Twèndè twônsò tukesè twà macimbu atu, wènda ùbànda mu Nyumà, (mu banyààbanya, mu bushùwà bwà bwalu), ûlwa mu Nyumà, kàdi ùbànda mu mwaba wà mùshindù ewu too ne mùdìYe ùkafika mwaba ùdi Nyumà Mwímpè ùkwàcilaMù mudimu, wènda ùDipandila njila, mudyàkàje bwà kwakidila Mukalenge Wendè, mudyàkàje bwà kwakidila Mukalenge Wendè.

²²⁶ Kàdi yônsò mikwàbò yàkadyènza bulongolodi, yàlukila mu maalu à pa buloba, mikòsòlòke, yàlukila mu nsangilu, yìkabwela mu nsangilu munène ku bulombodi bwà bwena Kàtòlikè. “Ne kùvwà cimfwànyì cyà nyama wa lwonji.” Cimfwànyì, “cintu bu nànkú.” Nsangilu wa èkèleeziyà mwenza kùdi bwena Kàtòlikè, bùbìdì bwàbò pàmwè, bàdi bàkwàta mudimu pàmwè. “Nganyì

udi ne bukolè bwà kwenza mvità ne nyama wa lwonji anyì cimfwànyì cyèndè?" Cyà bushùwà kakwèna muntu to. Mùshindù mwinè utùdiku bafwànyìne kushààlapù munda mwà mèbà's we!

²²⁷ Mpindyewu lekèlaayi nnwambile eci, pashiìshe nekùlwé cikondo cyà kwimanyika. Mbwalu ndi ne... Mvwa munwambile ne nebiìkalè bile. Ndi—ndi ànu ndyùmvwa mutàmbe kubìnduluka. Pàvwà nànsha Nzambi mene mwambe bintu ebi, wàmba ne: "Baambilè. Cijikùle. Kùshààdi mupùwe kàbìdì ntàntà mule nànsha. BàleejèCì. Bôbò kabàyì baCyakìdile to, dìbà adi mashi kaèna pa byanza byèbè to." Ki dìbà ndyôdì edi. Cikondo, byônsò byâtù ku cibungùbungù.

²²⁸ Buloba bùdi ku ndekeelu wabù. Kabwèna kàbìdì mwà kwimwanyina kuulu to. Mvità yìdi ku ndekeelu wayì. Kanwèna mwà kupeta kàbìdì mvità nànsha. Nwènù biikalè ne mvità, kayàkunènga to; muntu wa kumpàla ùdi ùlenga ku ndéndè awu, kùdi kùmbà kùdikosa. Cidiìdì, ncibolè ne cyonèke.

²²⁹ Bukwa èkèleeyiyà mba-Méthodiste, ba-Baptistes, ba-Presbytériens, beena Mpenta. "Nguluba mu bitoci byàyì, mbwa mu bilùshì byàyì." Aci's ncilelèlè, yônsò wa kùdibo! Nzambi ùdi ubiìkila Èkèleeyiyà udi musungula awu, bwà kupàtuka mu dibola adi. Aci ncyà bushùwà menemene. Esawù, kwambabò ne: "Twétù ki èkèleeyiyà!" Mémè ncyéna ngèèla aci mpatà to. Yakòbò's ùvwa taatù wa Esawù, yêyè pèndè, ncyà bushùwà, pa nànkù, kàdi—kàdi... Ndi njinga kwamba ne, Izákà ùvwa tatwèndè wa Esawù, ne Yakòbò ùvwa mwanààbò, pèndè. Kàdi umwe ùvwa ne difutu dyà bukenji bwà bwanàbutè; mukwàbò ùvwa mudìkine. Umwe wàkuumvwa, kujingulula, ne kwenza. Mukwàbò yêyè kwamba ne: "Kaa, bu mündì ànu nya mu èkèleeyiyà ne ngènà cìdì cyakàne, bìdi ne dishìllangana kaayi?" Ki bwalu mbwòbù abu's. Mpindyewu mu...

²³⁰ Nànkù ndi ngàmba eci, bwà kwoya, kakwàbò kantu kândì ndeeja aka. Èkèleeyiyà mulelèlè ùdi ne byàbûngì menemene byà kwikadila ne mwoyi bwà mpindyewu. Kaa, civwa ne cyà kwikala cikondo cyà cyanga menemene bwà Èkèleeyiyà mulelèlè, bwà Èkèleeyiyà wa bushùwà, bwà Èkèleeyiyà musungula, paùdì umanya mu mwoyi wèbè ne udi muumùke ku lufù tuyè ku Mwoyi; Paùdì ùditàngila wêwè mwinè ne umònà, utàngila nsòmbelu wêbè ne umònà ne bintu byônsò byà pa buloba bïkaadi bimanè kupìta, bwà ne udi mulwe cifùkìlbwà cipyacipyà. Tèèlejààyi mpindyewu, bwà kujikija, ne ntèmà yônsò. Udi mumanyè ne ukààdi muumùke, nsòmbelu webè ùdi úcijaadika ne: "Ku mamuma àbò nkunwàbàmanyinà." Kiipàcilà kèebè kônsò nkoòòng n'Kilistò. Udi muMwindile bwà kulwaYè mu kasunsa kanà kônsò. Wêwè udi wenda mu Nyumà. Udi muMunangè. Udi uMumònà ùkwàcila mudimu munda mwèbè. Kaciyi cintu nànsha cìmwè cyùdi wêwè ujinga kwenza to, kàdi Yêyè ngùdi ucyènza, Yêyè mwinè. Kaa, cikondo kaayi's wè!

²³¹ Cìdi cìmvùlwija muzòdi wàkaya ku Rome awu, bwà kulonga mwà kwikala muzòdi, nsongàlùmè wa citende. Bâàkamumònà. Ùvwa mushììlàngànè bikolè ne bansongàlùmè bônsò bàà cyena Àmèrikè ne bansongààkàjì, ne bintu bìvwà bijè kuntwaku bwà kwikala bazòdi, ne bàà mu myaba mikwàbò yà pa buloba. Ewu nsongààlùme yéyè ùvwa katàdì wa pabwèndè. Ùvwa muntu mwîmpe, ne bôbò kudìmwèna. Bâvwa mwà kwenza mafetè manène, kàdì kupweka kuntwaku ne, mùshindù ùtùbò bènza mu Loomò awu's, bâkwàcika ne mwàbò mwônsò amu.

²³² Mêmè mwinè, mvwa kuntwaku, kâbìdì kubàmònà. Bâpàtuka mu mùsèèsù, balùme ne bakàjì, kàdì bènza maalu à lukutukutu. Too ne mu mpangu minène, bângatangana bu balùme ne bakàjì mu lupangu lunène, patòòke too, kabàyì bâbùcyùka nànsha; Angleterre, pèndè, ne bakwàbò bônsò. Nwamònù anyì? Aku kî nkubì kupita munwemu to. Cìdi ànu cintu cyà mwomùmwè ne munwemu, ànu byètu byà bibì ebi; cikòlà, mbaciëwikilekù ànu kakesè ndambù munwemu, bwà bampùlushì ne bikwàbò. Mpindiewu, kàdì bìdì ànu bibyâbìbyàlà!

²³³ Èè, nsongààlùme ewu, yéyè ùvwa mudìlamè ku bintu byônsò ebi. Pàvwàbo bàye mu mafetè àbò awu, ùvwa ùbàlekela bàye, cikòlà ùvwa munkaci mwà kulonga bwà kwikala muzòdi. Pa nànkù, dîngà ditùkù mulami wa lupangu wa kale uvwa mwena Kilistò ùvwa usanganyiibwa pabwípi ne—ne nzùbu wa dilamina mpìngù awu, ku màgàjiinyì à mpìngù, yéyè kwamba ne—yéyè kwamba ne: “Lwâkù tükendàkànèku, mwanàànyì wa balùme. Lwâkukù tükendàkànè, ndi muswè kuyikilaku neebè kâtancì kakesè.”

Yéyè ne: “Èyo.”

²³⁴ Ki kuyabo, bênda bàbànda kakùnà, ne bônsò bwàbò ne byanza byela paanyimà, kubàndabo kakùnà. Dîbà dìvwa dyènda dìbwela. Ki muntu mununu ewu kwambila muzòdi wa citende ewu, wàmba ne: “Mwanàànyì, udi mwena Àmèrikè's.”

Yéyè ne: “Èyowà.”

²³⁵ Yéyè ne: “Udi mulwè kunweku bwà kulonga dizòla. Ndi ncinka ne udi wipacila bwà kwenza mudimu wà muzòdi mu nsòmbelu webè's.”

Yéyè ne: “Ndi ndilongolola bwà kwenza cyôcì aci, mukalenge.”

Yéyè ne: “Ndi njingulula ne wêwè udi mwena Kilistò.”

Yéyè ne: “Mêmè ndi mwena Kilistò.”

²³⁶ Yéyè ne: “Èè, kùdi cintu cìmwèpelè cîndì muswè kukukonka. Ndi mukonke bakwàbò abu. Mbàmbe ne mbeena Kilistò, bôbò pààbò.” Yéyè ne: “Ncinyì cìdi cikwenza mushììlàngànè nùnku? Ncinyì cìdi cikwenza mushììlàngànè ne bakwàbò bansongààlùmè bàà ku Àmèrikè aba, ne bansongààkàjì bàdì bafûme ku Àmèrikè aba? Ncinyì cìdi citàmba kukwenza

mushììlàngàne bikolè nànkù, pèènù nwamba bônsò ne nudi ‘beena Kilistò?’”

Yéyè ne: “Mukalenge, udi umònà mùdì dìbà dìbwela emu anyì?”

Yéyè ne: “Ndi mumònè.”

²³⁷ Yéyè ne: “Dyàmwàmwà dyà mbû dyàdyà, mu ditùnga kampànda mu Nouvelle Angleterre, mu cimenga kampànda mu ditùnga amu, ne mu nzùbu kampànda mwinè mu cimenga amu, mùdi nsongààkàjì kampànda ûndì mulayè ne nénshaalè ne lulamatu kùdiye.” Yéyè ne: “Ki cyônsò cìdì mu meeji ànyì, bwà kulonga kuzôla ne kwalukila kùdi nsongààkàjì awu udi ne lulamatu kündì.” Yéyè ne: “Ke bwà cinyì ndi ngènda bu mündi ngènda emu.”

²³⁸ Kaa, mwanèètù wa balùme, mwanèètù wa bakàjì, udi mufwànyìne kudîkonka bwà cinyì katwèna tucyùka ménâ àdìbo bâtwinyika. Mémè ncyèna ncyùka bîdîbo bàmba to.

²³⁹ Mvwa mwimàne ne Fred dîngà ditùkù, kwinshì mu San Juan, mu Puerto Rico, mvwa mutàngile dyàmwàmwà dyà mbu, ke mêmè kumònà ne, mabwe à kumpenga kwa mâyì awu, ntàntà wa mètres nkàmà mwandamukùlù, mavwala manène àbànda. Ki kwambayè... Ntuubà yènda yèndakana mu budimi, ne bikwàbò. Mémè kwamba... Yéyè kwamba ne: “Mwanèètù Branham, eci ncyêenze ànu bu Dyulu.”

²⁴⁰ Mémè kwamba ne: “Kàdi’s mbû neyìkale mubàtamè kwàka, mwanèètù.” Mémè kwamba ne: “Ànu dyàmwàmwà dyà mbû dyàdyà, kùdi mwaba kampànda ùbììkidiibwa ne Dyulu, kùdi Muntu kampànda Wàkuumusha mpèkaatù yànyì yônsò. Nènku ngaakaMulaya ne nêngendè ne lulamatu kùdiYe, nêngenzè bintu bîdìYe muswè bwà mêmè kwenza. Ki bwà cinyì mêmè ncitu ngùmywa bundù bwà Èvànjeeliyò Wendè to, Ùdi Bukolè bwà Nzambì bwà lupàndu.” Ki cìdì cyènza ne mwena Kilistò ikalè ne nsòmbelu mushììlàngàne. Yéyè mmushììlàngàne bwalu ûdi ne Cintu kampàndà cyà kwikadila ne nsòmbelu mushììlàngàne.

Twìnyikààyi mitù yètù katancì kakesè cyanàànà.

²⁴¹ Mulunda wànyì mucìbùlùke, mu dìndà emu, udikù ne cintu kampànda cishiìlàngàne cyà kwikadila ne mwoyì, cintu kampànda cyà kukupàtula naaci mu byà pa buloba, cintu kampànda cìdì ne mushinga wàbûngì menemene kùdi kutàmba byà pa buloba byônsò, nkwikala ne mwoyì bwà Kilistò anyì? Wêwè kùyì ne aci to, bwà cinyì kwèna mwà kuCyàkidila mpindywewu ewu. Kùyì mu èkèleeyiyà ànu bwà kwamba ne: “Ndi muswè kwikala muntu mwîmpè to.” Kwènji nànkù to. Udi muswe kwikala mwena Kilistò. Wêwè, piìkalàku misangu yônsò cintu kampànda mu mwoyì wébè, cikwàmbila ne: “Kwena mujaalàme to, kàdi ndi muswè kwikala mujaalàme.” Wêwè utu misangu yônsò ànu mujinge kwikala cintu kampànda cyûdi

kùyì mpindyewu to, kwêna mumanyè ne n’Nzambì udi munkaci mwà kukubìikila anyì? Kùcyedi nyimà to. “Bwalu pawìkala wakakenkeshiibwa musangu kampànda ne mupetè mpùngà, kàdi mucìdyombole musangu wèbè wà ndekeelu, ki nkushààle kàbìdì mulàmbù wà mpèkaatù to.” Kùkabwelakànyì ne Esawù to.

²⁴² Lwâku kùdì Yakòbò, kùyì ucyùka ní . kùyì ucyùka cyàkwenzekela nànscha. Byôbi bikwangàte nzùbu webè, byôbi bikwangàte mudimu wèbè, byôbi bikwangàte bàyeebè, byôbi bikwangàte mukàjèebè, byôbi bikwangàte bânà bèèbè, byôbi bikwangàte ní cinyì cyônsò, petà wèwè bukenji bwà bwânàbutè! Ki bùdì ne mushinga. Nénku wèwè mûmvwe mûshindù awu, mu dìndà emu, ne mufwànyìne kujinga bwà kupeta bukenji bwà bwanàbutè ebu! Mêmè ncyêna mwà kukupèèshaci to. Nzambì ùdi mwà kukupèèshaci, ne Yéyè Ngudi wakula neebè ewu. Udku mwà kwela ànu cyanza cyèbè muulu cyanàànà, kwamba ne: “Nsambidiléku, Mwanèètù Branham. Bukenji bwà bwanàbutè abu, mbündì muswè.” Nzambì ànubènèshè, myaba yônsò. “Bukenji bwà bwanàbutè, mbündì muswè.”

²⁴³ Taatù wetù wa mu Dyulu, ndi nKusàkidila, Nzambì Mutàmbe Bunémè ne wa Cijila, bwà bwímpè Bwèbè bwônsò ne luse kùdì bânà bàà balùme ne bàà bakàjì bàà bantu. Ne tudi tujingulula ne tudi ku cikondo cyà nshìlikidilu, kakwèna cintu cidì mwà kutamba kunenga bikolè to. Tudi ànu bindile mu cikondo citùsombesha; ànu mwàkadìbi mu matùkù à Noà, mwoyi mule wà Nzambì, pàvwà bwâtù munkaci mwà kulongolodiibwa, pààkasungidiibwà misùukà ànu mwandamukùlù cyanàànà. Wèwè wâkamba ne: “Ke mwìkalàbi nànkú ku dilwa dyà Mwânà wa muntu. Mwoyi mule wà Nzambì, kàyì muswè bwà muntu nànscha umwe àbütukè to, kàdi bwà bônsò bààmònà mwà kulwa ku kanyinganyinga.”

²⁴⁴ Nénku leelù ewu mu nzùbu emu, kùdi balùme ne bakàjì bélè byanza byàbò muulu, bânà bàà balùme ne bàà bakàjì, bansonga ne banunu, mbélè byanza byàbò muulu, kàbìdì bàmba ne: “Kùdi Cintu kampànda cìnkòka.” Éyì Nzambì, swâkù bwà kabàCìdyombòdìku nànscha. Swâkù bàsùmbishe malonga àbò, swâkù bàsùmbishe bintu byônsò bidibù naabì. Bu muntu wakasangana dibwe dinène adi; divwa dyà mushinga, dibwe dinène, divwa dibwe ditàmba bunène, nénku wàkasùmbisha twèndè twà tukesè twônsò, bwà wàmònà mwà kusùmba dibwe dyà pabwàdì adi, dyà dinène. Swâkù bwà bàsùmbishe cintu cyônsò cyà pa buloba cìdìbo naaci, mu dìndà emu, dimanyika dyàbò dyônsò dyà pa buloba.

²⁴⁵ Bakàjì bâdì basòmbe apa aba, Mukalenge, bààbûngì bàà kùdìbo bâkaadi bumvùmvwe Èvànjeeliyò muyiishiìbwé misangu yàbûngì be, cìkòlà bènda ànu bâlìlakana mu maalu à pa buloba, ne bâditwàla bu bàà pa buloba ne bâvwàla bu bàà pa buloba, ne bàya mu mafetè ne mu bintu bìdì bàà pa buloba,

bààbanyangana bintu byà pa buloba ne bènza maalu bu bàà pa buloba, ne biikàle bàkwàta mudimu ne bintu byà pa buloba. Éyì Nzambì, swâkù bwà bàdyúmvwè bundu, mu dìndà emu. Kwôkò kwikàleku ditèkemena kampànda munda mwàbò emu, Mukalenge, dìkàngulaaku leelù ewu. Swâkù bwà edi dììkale dìbà.

²⁴⁶ Ne balùme bàdì mwab'ewu aba, Mukalenge, Éyì Nzambì, bàfwìlèku luse. Bâàbûngì bàà kùdibo bacìdi bápatuka bëndela mu bintu byà pa buloba baciikàle ànu bàjinga ne bàsànkila mu bintu byà pa buloba, mpèkaatù, dinwà dyà mfwankà, dinwà dyà maalà, maalà à mu nsòmbelù, ndambù wa byérè ku luseke, anyì-anyì cintu kampànda cyà mùshindù awu, anyì bafwànyìne kwalakana, ne bàlamika bibèjibeji byà bakàjì batekète, balwàt bilàmbà byà manyaanù. Ne mibidi ayi yìdibo bàbandila mu mùsèsù, ne bafwànyine kutuuta too ne bantu ku màshinyì bwà dibâtàngila, bàdìbìkila mùdìbo beena Kilistò.

Kàdi pààbò mbamanyè ne mbungakenu wa mubidi wà mukàjì awu, pàmwàpa mu mèbà makumi àbidì ne ànaayi àdì àlonda, newìkalè wènda ùbola mu lukita mwàmwa, biinya ne misàndà byènda bilandala mu mijilu mifwimba ne milongolola yà mubidi wèndè ayi; kàdi musùùkà wèndè mwàmwa mu ifernò wa dyabùlù, bwà mùshindù ùvvwàye mwênde. Kàdi, nànsha nànkü, neàtadikè tushìkù twèndè tukesè, tupenta atu muulu, kàdi kokenya ku ménù ùkuseka.

²⁴⁷ Nzambì, ikàlàku ne luse bwà bantu abu. Éyì Mukalenge, kùbàlekèdì bàjìmina to. Bwà luse ikàlàku ne luse kàbìdi ne tumàku luse. Pèeshaku yônsò wa kùdibo, Mukalenge. Wèwè ki Umwèpelè udi mwà kufila dibènesha edi. Nènku pawìkalè Wèwè mubàbiìkile ku Mwoyi wà Cyendèlèèlè, swâkù bwà myoyi yàbò yìkangukè; ne bàtekà bintu byônsò ku luseke mu dìndà emu, ne pashiìshe nebacyängàtè. Enzàku nànkü, Taatù.

²⁴⁸ Nènku mpindyewu swâkù bwà Nyumà Mwímpè àbwelèku mu disangisha edi, bwà babèèdì ne beena ntàtu, ne bantu bàmonèku ne Mukenji ewu ùdì muyishìibwe mu dìndà emu, ne Dilwa ne byônsò bìdì ku ndekeelu, ne nànsha mene Yesù munkaci mwà kukwàta mudimu mu Èkèleeziyà Wendè. Byenzekèku mpindyewu mene, Mukalenge, bwà Wèwè kumònà mwà kwangata bantu aba mu byanza Byèbè. Nènku pàdìbo bàmònà Nyumà Mwímpè ùkwàta mudimu, wèndakana munkaci mwà bantu, swâkù bishìndikiibwè, Mukenji ûndì muyishe, bwà ne tudi ku ndekeelu kwà cikondo. Nènku swâkù bûmvwèku. Bûmvù, kàdi swâkù bwà bàjingulule ne Yesù umweumwe awu, mùshindù wàkenzà Ye mu ditùkù Dyèndè awu, Ùdi mwab'ewu ùcyènzela mu Èkèleeziyà Wendè mu ditùkù dyà ndekeelu emu. Nènku dìbà adi swâkù bënzeku, mu kufilà kwà myoyi ne mibidi yàbò, ne misùùkà ne nyumà, kùdìYe. Ndi nKupèeshabò, Mukalenge, mu Dínà dyà Yesù.

²⁴⁹ Mpindyewu, mu nzùbu mùdì bantu emu, mvwa mutùme Billy mu dindà emu bwà kwabanya twartà twà disambila. Yéyè... [Katùpà kàà mukàbà wà mèyi munda mutupu—Muf.]

²⁵⁰ Udi usaama, mu lukèngelu anyì? Bu Nzambì mwà kumbuulwila, bu mwàkenzelà Ye mukàjì ku ciinà cyà mâyì, ne kungambila lutàtu lûdì naalù, anyì cintu kampànda cidi cikutàngila, cyûdì wêwè mumanyè ne mêmè ncyèna mucimanyè aci, ncifwanyinekù kukupesha diitabuuja bwà kwitabuuja Nzambì anyi? Ncifwànyinekù kwenza ne nwènù bakwàbò nùpetè diitabuuja anyì? Eci ncikondo cyètù cyà kumpàla cyà twêtù kutwìlangana anyì? [Mwanèètù wa bakàjì awu ùdi wàmба ne: “To.”—Muf.] Kaa, ukàtu mummône kumpàla, kàdi pàànyì mwikàle mwenyi kûdì. Ncyà bushùwà anyì? Bîmpe, Mukalenge Nzambì ànyishékù àkupèeshè mulòmbò wèbè.

²⁵¹ Mpindyewu, mbulelèlè, anyì to? Kaa, ekèlekèle! Sòkaayi ntèndeleelu wenù wa mamanya à mu mutù awu. “Baalà,” nwamba ne: “ùdi penyi?” Eliyà ku mukùnà wà Kaamèlè, wàkamba ne: “Baalà ùdi penyi? Penyi? Mubìshaayi.” Kabyèna bìkèngela bwà wêwè kubisha Yesù to. Yéyè ùtu dìbà dyônsò ànu mutàbâle. Yéyè ùdikù dìbà dyônsò, ne mwoyi kashidi, ne bukolè kashidi; umweumwe awu makèlèlè, leelù, too ne kashidi. Amen. Nzambì ùdi ùshàala Nzambì.

²⁵² Udi witabuuja ne disaamà dyèbè dyà mwoyi nedìkushiye ne neúmvwè bîmpè anyì? Kwèna wa munwemu to. Wêwè udi walùkila ku Lexington ne ùkalondèlè bantu bintu binène bìdì Mukalenge mukwenzèle. Wamònou anyì?

²⁵³ Bidi bipìcila bantu pa mitù, bâdì kacyà kabàyì babyùmvwa nànsha. Ekèleeyiyà wa mwoyi ùvwa mwà kukwàta cyôcì aci, lükàsàlükàsà, ne kumanya ne Bwikadi bwà Nyumà Mwîmpè bûdi mwaba ewu.

²⁵⁴ Muntu kampànda lwà mu ndekeelu emu mmwelè cyanza cyèndè muulu. Ùvwa ngwèwè anyì, inâbànzà? Udi witabuuja ne Nzambì ùdi mwà kungambila lutàtu lwèbè anyì? Mukulumpe...

²⁵⁵ Mwanèètù udi lwà ku ndekeelu wàwa, ndi ngèèla meeji ne wàmbì, kùkaadi katancì, ne... Udi witabuuja anyì, mwanèètù? [Mwanèètù wa balùme awu ùdi wàmба ne: “Eyowà.”—Muf.] Udi witabuuja menemene anyì? Dìbà adi disaama dyà pa dikòbà adi nedìkushìile kaaba, neùsangalè. Udi witabuuja nànkù anyì? Udi ucìtaba bu mwondòpiìbwé anyì? Elà cyanza muulu, udi witabuuja menemene. Nwamònou anyì? Uh-huh. Eyo. Yéyè mmwenyi kûndì. Udi mumanyè aci’s, Pat.

²⁵⁶ Mukàjì udi mutàngile kwaka ewu, munkaci mwà kusambilà, ùvwa muntàngile, wàmба ne ùvwa mwenyi. Udi witabuuja ne disaamà dyà mashi ènda lùbilu adi nedìkushìlè kaaba anyì? Ncyà bushùwà, kî mmwômò anyì? Elà cyanza cyèbè muulu piìkalabi ne ncyà bushùwà. Eyo, ikàlà ne diitabuuja mu Nzambì.

Nudi numònà cîndì njinga kwamba aci anyì?

²⁵⁷ Kadi bìshi bwà bàmwè bàà kunùdì bàdì bammanyè? Udi ne cintu kampànda pa mwöyi wèbè. Elà cyanza cyèbè muulu. Nudi bààbûngì be! Ncyéna mwà kucyènza to; Cìdì ànu ne cyà kulwa. Nudi bamanyè's, ndiitabuuja dyènù.

²⁵⁸ Georgie Bruce, ndi mumumònè musòmbe mwaba awu. Wêwè utu misangu yônsò ànu uteeta bwà kupeta cintu bwà muntu mukwàbò, Georgie. Uvwa mwondòpìlbwe, ku kànsérè. Kakwèna mpatà mu meeji èbè to. Ditükù diwàkalwà mu tabernacle emu ne kupàtuka ku ciibi cìdì pambèlù pàpa, Nyumà Mwîmpè wàkampwekela, ne kukwambila ànu mwaba awu cyenzedi kampànda cìvwà muntu kampànda wa pa buloba kàyì mumanyè to pa kuumusha wewè ne Nzambì ne muntu mukwàbò. Ncyà bushùwà anyì? Ncyà bushùwà. Udi ungiitabuuja mêmè, kí mmwòmò anyì, Georgie? Udi ne cintu kampànda pa mwöyi wèbè, Georgie. Udi witabuuja ne Nzambì ùdi mwà kungambilà cìdì pa mwöyi wèbè anyì?

Aci ncifwànyìnè kwenza ne bwônsò bwènù, bantu bàdì bammanyè mêmè, nwìtabuujè anyì?

²⁵⁹ Ndi mumanyè Georgie, kàdi ùdi wèla meeji à cintu kampànda. Ùdi ne bantu bàbìdì, bàdì ntàntà mule ne apa, bàdiye ûsambidila. Bônsò bwàbò mbasòmbèle mu Corydon. Ncyà bushùwà. Kàdi ùdi ne muntu mùnwemu, muntu mulùme udiyè ûsambidila, udi pambèlù apa mu lùpitàadì. Ne wêwè udi munkaci mwà kusambila, kabiyì nangànangà bwà dyondopiibwa dyèndè to, kàdi bwà lupàndu lwà musùùkà wèndè. Aci's ng'EMU MÙDI MUKALENGE WÀMBA. Ncyà bushùwà. Ncyà bushùwà anyi, Georgie? Ncyà bushùwà menemene.

²⁶⁰ Muntu kampànda lwà paanyimà pààpa mmwelè cyanza cyèndè muulu, lwà mu ndekeelu menemene, mu ndekeelu emu. Wêwè, bwalu bwèbè bùdi bìshi? Udikù mwà kwela cyanza muulu anyì, udi mwenyi kündì anyì? Muntu mulùme udi musòmbe kaaba aka muntàngile ewu, ncyéna mukumanyè to. Udi witabuuja ne mêmè ndi mupròfetà wa Nzambì, musadidi wa Nzambì anyì? Udi witabuuja Nyumà Mwîmpè, cîndì mwambè aci ne m'Bulelèlà anyì? Udi witabuuja Aci anyì? [Mwanèètù awu ùdi wàmба ne: "Eyowà." —Muf.] Bu wêwè mwà kwitabuuja, udi ne . . . ki cintu cimwèpelè cyûdì naaci, bwalu udi usaama kànsérè. Ncyà bushùwà. Kwêna wa mu cimenga eci to. Udi wa mu New Albany. Aci ncyà bushùwà. Ne udi ne kànsérè. Bu wêwè mwà kwitabuuja ne mwöyi wèbè wônsò, neúmvwè bîmpè. Neùcítàbè anyì? Elà cyanza muulu. Mukalenge àbèneshiibwè.

²⁶¹ Ndi ngìitabuuja, mukàjì wàwa udi ne cifulu cìmwèka citòòke ku mutù kwèndè, inâbànzà wa bafìlkè, mmwêle cyanza cyèndè muulu. Ncivwa mwânjì kupeta muntu mufìlkè to. Udi witabuuja anyì, inâbànzà? Eyo, mukalenge, itàbùùjà ne mwöyi wèbè wônsò. Udi ne dísamà dyà mwöyi, dísamà dyà cifu, ntàtù

mikòdyàkànàngàne. Muntu kampànda mmukufikìshe kaaba aka mu dìndà emu. EMU MMÙDÌ MUKALENGE WÀMBA. Ncyà bushùwà, kí mmwômò anyì, inábànzà? Pììkalàbi ne ncyà bushùwà, nyungisha mùshwâlà ûdì naawù mu cyanza awu, bwa bantu kumònabu. Kacya ncìtukù mwanji kumònà mukàjì awu to kacya bändela.

²⁶² Uvwa mwelè cyanza muulu anyì? Mêmè ndi mwenyi kûdì anyì? Ne wêwè mwenyi kûndì. Udi witabuuja ne Nzambì mmummanyè, anyì Nzambì mmukumanyè anyì? Udi witabuuja ne Yéyè ûdì mwà kungambila cìdì pa mwoyi wèbè anyì? Udi munkaci mwà kusambidila muntu kampànda. N'tatwébè, udi ne disaamà dyà mwoyi. Ncyà bushùwà. Ne wêwè udi munkaci mwà kukeba dibàtiiza dyà Nyumà Mwîmpè. EMU MMÙDÌ MUKALENGE WÀMBA.

Bu wêwè mwà kwitabuuja!

²⁶³ Bwalu bùdi bìshi bwà inábànzà wàwa ne cyanza cyela muulu mùshindù *ewu*, udi witabuuja anyì? Lutàtù lwèbè mmubòzù ûdì ku cyanza cyèbè awu. Kàdi udi munkaci mwà kusambidila mwikùlwèbè. Ncyà bushùwà. Mwânà awu kénà bîmpè to. Aci's ncilelèlè. Ki mmwômò anyì, inábànzà? Udi witabuuja ne mwoyi wèbè wônsò, bwà bwalu abu.

Pângààkambà ne: "mwânà." Anjì indìlè kakesè. Kaa, s'ki bwalu mbwôbù abu's. Mwanèèbè wa balùme ùvwa mupetè njiwù yà màshinyi; mucìbükile pansi. Ncyêna mukumanyè to, inábànzà, kàdi aci ncilelèlè. Pììkalàbi ne ncyà bushùwà, ela cyanza muulu.

²⁶⁴ Mpindyewu, Nganyì udi kaaba aka ewu? Nganyì Mwinè awu? Ki mmêmè to. Mmunyì mûndìku mwà kwenza nànkù? Kanukwàciki tukùlakàjì twà Nyumà to, bintu byà Nyumà. N'Nzambì kaaba aka! Nyumà Mwîmpè ûdì ujinga awu, udi uMwitabuuja mpindyewu anyì? Udi uMwitabuuja mpindyewu anyì? Èyo, nànkù Mwakidilaaku mpindyewu. Mpindyewu ki dîbà dyà kuMwakidila. Itàbùùjà ne mwoyi wèbè wônsò.

²⁶⁵ Wêwè udi usaama anyì mu lukèngelu awu. Ncyêna mwà kwondopa to. Muntu nànsha umwe kénà mwà kwondopa to. Ncyêna mwà kufila Nyumà Mwîmpè to. Kàdi Ewu udi mwà kwondopa ne kufila Nyumà Mwîmpè, Ùdi kaaba aka. Yéyè Ngudi Ucyènza.

²⁶⁶ Mpindyewu inyikaayi mitù yènù pansi. Itàbuuaayi ànu mpindyewu, pândì nnusambidila ne mishwâlà eyi kâbidi apa.

²⁶⁷ Taatù wetù wa mu Dyulu, ne mwônsò mûndì pàànyì mumanyè, ndi mupicile kudi bwônsò bâvvâ beenyi, mûmvwâ ngùmvwa ngènda nteketa ne ncyoka; mêmè kudyùmvwa mulombòdùibwe ne eci ke cikondo pàmwâpa cìdì Basungula bamònè. Swákù bwà yônsò wa kûdibò, Mukalenge, uvwa mubiikidiibwe ne mwanyishiibwe bwà kwikala mubiikidiibwe kûdì Nyumà Webè; cintu kampànda, diitabuuja dyàbò, bâvvwa

ne diitabuuja dyàbûngì (bàmwè bàà ku bôbò) kutàmba mùvwàbo bèla meeji ne bàvwa naadi. Mbabangile ànu mu myoyi yàbò.

²⁶⁸ Ki mukàjì awu kulengayè civwàlù Cyèndè musangu kampànda pàvwà Ye ùpità, ke kukùdimuka Yè ne kwamba ne: "WàNdengì awu nganyì?"

Ki bôbò ne: "Èè, bantu bônsò mbaKulengè."

²⁶⁹ Yéyè ne: "Kàdi Ndi ngùmvwa ne Ndi ne butekètè." Ki kusangana Yè mukàjì mutekète awu ne kumwambila ne ùvwa ne dìsaamà dyà mashi àlwa munda, ne diitabuuja dyèndè dyàkamwondopa.

²⁷⁰ Ne Bible mmwambè, ne: "Yéyè ùcìdi ànu Mwakwidi Munène, leelù ewu, udi mwà kulengiibwa kùdì dyumvwa dyà mateketa ètù." Mufundù mmwambè ne: "Yéyè ùdi umweumwe awu makèèlèlè, leelù, too ne kashidi." Nènku piikalabi ne Yéyè udi umweumwe awu, ne Mwakwidi Munène umweumwe awu, Yéyè neençè cintu cìmwècìmwè aci ne kwenza cintu cìmwècìmwè aci.

²⁷¹ Ne swâkù bwà bantu bàmonè ne Èkèleeziyà mûle tèntè ne Nyumà ùdi wènda ùlwà mutàngile ku mutù. Kilistò ùdi pabwîpi ne kulwa kwangata Èkèleeziyà Wendè. Bimanyinu Byèndè binène byà ndekeelu abi, ànu mwàkadìbi mu matùkù à Sodomà; Wâkakula, kumanya Sarah, ne kumanya ne ùvwa ne mukàjì dyèndè Sarah, kumanya mùvvaye mu ntentà ùseka; Wàkamba ne: "Aci neciìkalè cimanyinu. Panwàcimònà, nwavùlukaayi, ne lukòngo alu kalwàkupita byônsò kabiyì byûlè to." S'ki cyôcì eci. Tukààdi ku ndekeelu.

²⁷² Enzàku, Mukalenge, bwà muntu yônsò udi usaama mwaba ewu amanyè ne Yesù Kilistò udi ne mwoyi awu ùdipù. Swâkù bwà mìshwâla eyi yìbèneshiibwè bwà mubidi wônsò ùdì ùsaama kwàyayi aku. Ndi mpiisha dyabùlù, bwà bantu. Ndi mmvipata, ku Nyumà wa Nzambì, mu diitabuuja, ndi ngìpata mundidìmbì wônsò wà mpatà. Swâkù bwà muntu yônsò kaaba aka, udi mulongolwela Mwoyi wa Cyendèlèlè awu, àWùpetè pa dîbà edi. Diitabuuja dyônsò dyà mìjìmbu, dyeyemena dikesè dyônsò, tuntu tukesè twônsò twà pa buloba, bujitu bukesè bwônsò, bu mìdì Bible mwâmbè ne: "Tùteekààyì ku luseke bujitu bwônsò, ne mpèkaatù udi utùjìngila bipeepèle; bwà twamònà mwà kunyeema, ne lutùlù, lùbilu lùdi lutèèkiìbwé kumpàla kwètù elu; batàngile" (ku cinyì? ku èkèleeziyà anyì? ku bulongolodi anyì?) "kùdì Mubangi ne Mujikiji wa diitabuuja dyètù," udi kaaba aka mpindyewu ewu, "Yesù Kilistò, Mwânà wa Nzambì." Batàngile kùdì Ewu Udi... Katwèna ne cyà kwangata myâkù yitùdì bamanyè yìdì milelèlè, kàdi nànsha nànku Mèyì awu mmavwijiìbwé malelèlè kutùdì mu dìndà emu. Yesù umweumwe wakafwà awu, kí mmufwè to, Yéyè mmubìike kàbìdi ku lufù, ne bidimu binunu bìbìdi pashiishe Yéyè ùdi ùtwàla Èkèleeziya Wendè ku mutù. Nyumà wa Yudààsà ùdi ùkwàta mudimu

munkaci mwàbò. Kàdi swâkù bâteekè ku luseke dibwè dyônsò dyà cilèndwishi ne byônsò, pa dîbà edi, ne bàMwakidilè.

²⁷³ Swâkù bâtèèlejèku, mùkaadìbo benzè, mu diyiisha emu. Swâkù bàjingululèku mpindyewu ne Mêyì mene àdibo bûmvwe mmamwènèshìibwe patòòke, ne mbajingulule Cyôcì aci, ne Cidi n'Kilstò. Nènku swâkù mpindyewu bwà bénzèku, baDîtèèke mu cyenzedi: bàDyakidilè, ne biimanyine kuulu, bàfilè bujaadiki; ne kubwela mu Bukalenge bwà Nzambì, mu kwikala bûlè tèntè ne Nyumà Mwîmpè.

²⁷⁴ Swâkù bwà babèèdì bwònđopiibwè. Swâkù bwà beena ntàtu bwònđopiibwè. Swâkù bwà dijinga ne dijinga dyônsò dyà mu mwoyi édi dìïkalè dilelèlè. Enzàku nànkú, Nzambì wa Ñukolè bwônsò.

²⁷⁵ Mpindyewu ne mitù yènù miinyika, myoyi yènù myunzulula, ànu bwà kunùpèësha cipòòlù cyà disambila; ànu kumpàla menemene, ngèèla meeji ne, mudimu wa dibàtiiza wùlwalwà, pabwîpi menemene ne cyôcì eci. Nekwìkalè disangisha dikwàbò dilòòlò edi.

²⁷⁶ Mpindyewu, vùlukààyi ne, kùlekédikù mpùngà ewu wùpità to. Ndi mwab'ewu kùkaadi mèbà matwè ku àbìdì ne citùpà, anyì mapìte, nteeta ànu bwà kwangata dîbà dyànyì, ne kutwàla Èvànjeeliyò, ne kuMubweja ànu bîmpè menemene. Dîbà adi tudi tupweka too ne ku ndekeelu; Kàdi cyena-bwalu mene cidi ne: kutèèleja, kujingulula, kwenza. Kanùlekedi eci cinùpìcila pa mutù to. Nudi baCyûmvwe. Nudi nwitaba ne Bwikadi Bwèndè bùdi apa anyì? Udi mumanyè ne n'Yéyè udi ukubìikila anyì? Dîbà adi enzèlaPù cyenzedi. Nzambi ikalè neenù. Ìkàlaayi ne cikondo cyà disambila.

²⁷⁷ Mwanèètù Neville, lwâku, katancì kakesè, mu disambila, bu wêwè mwà kubànda kùneeku.

Shààla ànu mumwimànyìke. 

60-0221 Kutèèeleja, Kujingulula,
Kwenza Cidi Diyi Dyà Nzambì Dyàmaba
Branham Tabernacle
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabéji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndala, kulamiibwa mu cikalwîlè, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org